

南海九江朱氏家譜卷十一

塔佛大學漢和
圖書館珍藏印

十五世 孫宗琦續脩

七世 孫學懋初輯
十六世 孫士報

十五世 孫士仁編校

十世 孫昌瑤續脩
十七世 孫西長

福元

十六世 孫奎元捐刊

顯元

家傳譜 世傳 外傳附

夫鼎有銘何謂也為子孫者論譔其先人之美德善功
烈勳勞慶賞聲名列於當時傳於後世是故銘之也夫
家有傳狀何謂也為子孫者論譔其先人之美上以移

太常牒史館下以垂譜錄訓子孫是故著之也然則三代之銘漢魏以來之傳狀其趣一也且昔者先王旌善之典嘗備矣王勳國功載在盟府太史內史受其貳而藏之而邦甸之遙間胥書其敬敏任郵族師書其孝悌睦婣黨正書其德行道藝鄉大夫大比而獻其賢能登於天府內史貳之是以鶉居陋處之士嘉言懿行咸達史官羸劉代降史職曠絕而私傳迺興太原王氏漢南庾氏等家傳虞氏家記范氏世傳紀氏家紀明氏世錄志藝文者不絕書然傳會無稽為後人口實蓋亦多矣

顏師古漢書註孟傳注云私譜之文家自為說事非經典妄相假託無所取信寧足據乎晁公武郡齋讀書志謂李繫錄其父泌崔允錄其父慎由事皆鑿空妄言無異莊周鮒魚之談賈生服鳥之對唐書取之反亂正史

我遷祖

諱元龍

府君之南下也歲歷緜曖行實失傳明時

金大參節以謂公輕財樂施克恢堂構

見白川公行狀

則慶基

自遷祖始矣始祖獻謀府君峻處士之節易世不滂忠

清遺澤佑啟百代是後國史所登方志所錄爛然耳目

閒不待家牒而知也而家牒所收亦多闕今輒擔拾其

所及知者討論而列於篇詎云美備妾惟兢兢於信而

有徵不敢蹈鑿空傳會之咎斯已矣烏虜地望何常繼

承為貴天中記曰謝氏自江左以降雅道相傳景恆澹

景仁裕以德業傳美景懋純景先述以節義流譽方明

行己之度元暉藻續之奇各擅一時可謂德門矣史又

謂袁朗先世淑顛粲皆唱義聲殉國難朗自以人地雖

琅邪王氏多公卿特累朝佐命有功鄙不與伍朗孫誼亦曰門戶者歷世名節爲天下所高老夫是也山東人尙婚媾重利祿何足道哉此則以節行爲階資賢於矜門第者遠矣烏虜後生其鑒於茲作家傳譜

世傳 以宗支爲次

始祖獻謀公

始祖諱子議字獻謀遷祖諱元龍公次子也宋度宗咸淳十年正月遷祖初抵南海九江愛其土沃民淳遵上沙里止焉或傳遷祖繇保昌南下先止邑東南太艮都後徙九江也逮公始著籍詳姓族源流公長於元老於明憑基造家克承先志緒業隆起豐饒振里中矣始著籍時孤生定居羣望未附公出與周旋

性量恢宏辭氣謙吉進止雍容甚可觀也里士大夫咸屬目下之內行脩舉與伯兄子誌悃悃友愛中外無閒言施及周親皆有恩紀初上沙富人關公與妻麥氏無子產女有淑德獨心重

公故選嫁而自託焉

謹按 國朝嘉慶末族監生光宇濬池龜山陽古上沙故壤得宋元祐元年關聰石

碑知上沙故關氏世居此碑見存縣志已錄

公眷懷存歿禮遇殷至展奠祭埽遂至

今不絕方公莫齒值明祖龍興廣張天網設不爲君用之罰公杖節貞固養重邱園終身稱元處士厥後脩崇祠墓大元處士之稱子孫世世弗敢違也

據楊瑞雲林坡公墓誌金節白川公行狀黃朝聘仰柏公墓表厚齋公宗

元康熙乙酉鄉試卷世紀康熙丙申譜參脩

二世平夫公性夫公

平夫公諱原達始祖長子性夫公諱善達始祖次子平夫性夫

其字也平夫又號上沙皆有涪行同氣三人雍穆競勸家益蕃
殖游里閭訓子孫姁姁卑讓有萬石家數馬之風鄉父老常顧
歎曰朱氏其世興矣

據崔吉正夫公墓表採訪冊參脩

二世正夫公

公諱稅達字正夫始祖三子也隱居不仕行積於家義信於鄉
救菑振貧一方倚重人有外侮卒能禦之同縣雲南糧儲崔吉
公來孫女夫謂公遭時承平優游泉石色養二尊左右無方可
謂曰孝與兄原達善達從容怡愉居無迕言可謂曰友妻兄子
李某幼孤露族惡謀篡其產公撫之如子無巇伐交卒獲全濟
可謂有恤孤之仁為人剛毅沈嘿罔以貪慾自浚可謂有立身
之義不出里巷四善備矣時論謂非私昵之言

據崔吉本墓表世紀康熙丙申

譜參
脩

三世寅齋公

公諱宗亮字允亮號寅齋上沙公長子也穎敏蚤成溫厚有醞
藉未嘗以才氣加人以詩補南海廩膳生時學校初建大邑弟
子勵二十人公出輒傾其曹偶洪武二十九年年二十一引吏
例授階徵仕郎宣德七年卒壽五十七葬新會帽子嶺或傳公
晚授館於帽子嶺邨訓導有恩歿窆其地鄉人命曰先生冢過
者起敬奉嘗久久不絕也

據厚齋公宗元康熙乙酉鄉試卷世紀康熙丙申譜採訪冊參脩

謹按明會典明史職官志從七品初授從

仕郎陞授徵仕郎正九品初授將仕郎陞

授登仕郎兩職迥異我家記載諸書均謂

公洪武二十九年丙子授徵仕郎階從七品墓誌祠主繫銜並同惟康熙丙申舊譜後傳作登仕郎殊誤今更正

三世隔川公

公諱南旺字允旺號隔川正夫公子也飛遜離俗娛志方外而任心平恕饜於羣議娶妻鎮涌馮氏生子毅置筵河清潘氏生二子殷勉又繼室同里何氏生三子仕清仕和仕志公正誼刑家靡存偏倚人謂鳴鳩七子均養之義公其有焉天順二年卒年六十九

據黃朝聘仰柏公墓表
世紀康熙丙申譜參脩

四世南塘公

公諱仕清字願潔自署南塘居士隔川公四子也平居無疾言

遽色儼儼恂謹與物鮮迕里士邨毗人人識其長者猶子廷實生而失怙第妻黃節行高奇公始終愍字之遂忘孤露桑園圍砥障西江洪武建隄後縣歷百年日形傾隨夏澇潰決產殖漂流公喟言脩繕增築下流遂董其役禱歲獲寧鄉人甚德之初公世席沃饒刻意詩禮霏霏以儒雅稱厥後裔緒蕃昌文學致身者相繼麻列論者謂三百年衣冠文物之盛先河蓋有自云宏治八年卒年五十二

據關仰旒公所公墓誌金節白川公行狀黃朝聘仰柏公墓表世紀康熙丙申

譜參脩

四世月塘公

公諱仕和字願中號月塘隔川公五子也以隱德表里中身範攸莊義方不替故子孫內外聞風興起者爲多宏治十二年卒

年五十四

據曾仕鑑裕齋公墓誌
世紀康熙丙申譜參脩

四世前塘公

子誠齋公附

公諱仕志字願佐號前塘隔川公六子也素履清致塵沔弗染
然襟度豪放曠達不羈世道清平諸兄宵構公耕讀之餘迺遨
游湖海以自適四方人士慕仰之如挹千頃之陂取厭拍浮莫
能測其際也成化十八年遘疾卒年勵三十二妻黃氏同里太
常少卿僉都御史重之姑守義六十年節行著朝野為一時女
士宗自有傳子廷實字國珍號誠齋亦端士以剛直聞

據羅憲
本墓表

世紀康熙丙
申譜參脩

五世蒙庵公

子南所公兩岑公附

公諱光字德輝號蒙庵敬齋公長子也充郡學弟子員讀書覺

舍教官婢與所私為賄遷計期於牆下公夜起婢聞履聲誤以
盜金投牆外公拾得之旦日學署誼闖聞教官嘆喏曰數年冷
曹積奉金五百夜來為姦人攫盡矣公悉數白歸之教官驚謝
讓不受學使者聞其義旌以廩宏治九年卒年五十七二子人
傑人侃人傑字汝才號南所疆幹立家第宅雲連與里人岑充
紹皆以貲雄一鄉鄉人為之諺曰汝才屋充紹穀人侃字汝直
號兩岑以禮補郡廩生能文喜俠落落自豪人頗譏其尚氣然
學使至咸器異之

據九江鄉志世紀
康熙丙申譜參脩

五世秋圃公秋澗公

秋圃公諱實字國大秋澗公諱瓚字國璋皆直塘公子也兄弟
俱禮法士日以謹家誠誦書史相勸勉能庀嘗田脩世祀族望

最隆秋澗流連詩酒尤講樂生法舊譜秋圃公生於天順元年丁丑壽七十六秋澗公生於景泰七年丙子壽八十六弟先兄生歲月必有誤存疑竅考並以耆耄考終據康熙丙申譜脩

五世荔莊公

公諱敬字遜之號荔莊直庵公長子也守素循理有淳古風宏治十三年卒年五十六子世芳乞銘於其戚順德劉布政士奇劉公曰混沌既邈有畏榮好古薄身厚志如荔莊者可銘也讀其狀見孫曾眾多文藻鬱起喟然曰昔人謂族大於子孫之才其荔莊謂乎吾無以逮之據劉士奇本墓誌脩

五世林坡公

公諱廷昭字國明自稱林坡山人南塘公長子也性慷慨重然諾一時薦紳與之游戶外屢常滿交游無顯晦有不軌於義者

訟言折之駟鞫矯矯聽者色怍羣嘯為大聲公鄉隣有火盜警挺身赴難必先有鬪訟未決者譬解百端誠懃達顏面不已其爭不止焦然若疾疢之在身湯火之燼於肌膚也諳形家言嘗從容謂諸弟曰大洲鍾氣厚當出賢哲不然彼術書可燒也卒購地居之先是羣從在黌舍者七八人不一第值秋榜發公方弄孫遽作而歎曰天寧限我邪特人事未既耳於是聘名師督程課諸孫髫年進學者三人嶄然露頭角迨公歿而科名仕宦烜赫冠一時後三十年郡邑士大夫澂江知府關學尹永昌知府易道源等謁其墓文曰梗柎豫章培植於數十年後可棟爍闕雕甍鴻濤鉅浸湧流於數千里外出自稗海蓬瀛蓋謂後人食麻廕也嘉靖十六年卒年六十七屬纊前一夕諭子女各退

獨嘯一僕具巾帨槃洗沐浴整衣冠坐正寢而歿其正性不亂

如此

據楊瑞雲本墓誌關學尹等祭文王宏誨白川公墓誌金節白川公行狀世紀康熙丙申譜參脩

五世公所公

公諱延安字國寧號公所南塘公次子也生而氣岸號稱魁壘任俠好義有里豪攫人產愬於公公鳴鼓攻之竟反其業里豪撼公謂必行構陷公曰吾直在理遑恤其它卒鉏其覲者公力也以故鄉鄙中事無鉅細羣往受質嚴公甚於官司戶以糧長應役人咸苦之公曰往役義也迺命其子文捷孫學裕行而誠以終事族屬漸蕃議建寢廟奉享嘗庀宗事彌年不決公毅然曰是誠在我倡義鳩工不日而就其勤事勸功多類此青田令同里關公仰旒謂公謹厚如石奮好義若太邱任俠本朱家疆

直近長孺不愧里中先逸矣先是南塘公窆西樵後數年公奉母以耐啟穴得泉伏地痛哭命卽發之或曰選日爲可否將有咎公號咷曰某無狀不能奉安先人體魄何以爲人矣有咎余自當之晨夜繭足荒山中數月卒獲兆於新會沙涌紗帽山旣而公歿殯石頭亦不利相兆者僉嘖嘖於紗帽山前餘地眾議紛糾迺三析而鬪於南塘公之前公竟獲中壤遂改攢焉論者益謂公得永從先人於地下其純孝所感靡閒存歿云嘉靖二十四年卒年七十二其改攢以萬曆三十一年

據關仰旒本墓誌脩

謹按涌字余隴尹竦二切與湧同說文騰

也又水名見水經

詳上祠字譜

廣東新語以爲

土人謂港曰涌音衝衝也似祗望文生義

近世文家或嫌其不典易以冲潔等字殊失考唐書孝友傳王博武許州人會昌中侍母至廣州及沙涌口暴風母溺而死博武自投於水廣州刺史盧貞葬之表其墓曰孝子則涌字爲粵人方言著於史籍舊矣

五世逸夫公

公諱廷哲字國賢號逸夫南塘公三子也幼慧好學以易補邑弟子員顓邃有聲改連州庠丁外艱遂棄而歸晚歲更以毛詩三禮鳴日與鉅人長者游而於同里太常黃公重尤款密性嗜栝杓偕從弟廷實與太常過從飲酒花辰月序輒就醺醉如司

馬德操狂入龐公家墮然不知誰爲主客也太常時語人曰坐中無逸夫誠齋終非雅會其見重如此家居勤惕夜分必褰帳幔而視之者三故家無怠政坦中樂施子懷其惠者至多訓子孫有成法廣設嘗田以寓激勸故宗人脩儒業者想望德教逾久不衰兄孫謨首決科筮仕自謂皆公所玉成也嘉靖二十五年卒年七十二

據兄孫謨本墓表世紀康熙丙申譜參脩

謹按康熙丙申舊譜後傳謂公年七十七誤今據本墓表更正

五世綱齋公

子明泉公孫萊洲公碧潭公附

公原名廷英字國俊更名文錦號綱齋月塘公長子也以詩充邑廩生端重有蚤負才名先達倫祭酒以訓鄧御史直卿咸

有人倫鑒偉公標格各賦詩許與引爲氣類謂我輩人也嘉靖四年歲貢廷試高第次年授廣西靈川訓導視躬訓士一準於禮香山黃文裕公佐時爲督學重之考察文行爲粵西首下教諭諸生日漢詔曰古之立學將以傳先王之業流化於天下也儒林之官四海淵源宜皆明於古今溫故知新通達國體故謂之博士否則學者無述焉爲下所輕非所以尊道德也今靈川學官某和載六德容包六行學窮典奧文奮鸞龍可謂克振師資如漢詔所求矣令各學弟子委贊事之歷職三年擢權興安知縣又調義寧政事練達吏民懷之按院李公獎曰講學以古人爲法居官以風化爲先化育春融士類翕然而遵化文章豹隱遠近赫然而見知攝尹二載將真除矣公猶欲以上第取官

資不就報陞簿書稍暇卽退掩衙齋日手一篇不置竟以十年正月卒於官年五十四著有五經講解二子宗程紹魯孫學準學度學紀俱有學行宗程學度自有傳紹魯字東卿號明泉學準字平伯號萊洲更名滄西寧庠生學紀字綱伯號碧潭更名潤絲歲貢官保昌訓導善教有祖風壻曾應珪應珪子仕鑑外孫陳克侯關玉成克侯子善賡玉成猶子純皆雋穎取科第仕學有聲人謂公相攸之美黃公旣心重公後二十餘年纂廣東方志猶惓惓述公事不忘也

據九江鄉志外孫曾仕鑑本墓誌世紀康熙丙申譜參脩

五世裕齋公

子靜波公樂槃公附

公諱廷華字國用號裕齋月塘公次子也少嗜舉子業而能治家人產兄文錦宦粵西卒官季弟幼公所力產宅加楹田闢

析而均之諸猶子事無鉅細諮而後行閨門之內雍雍如也從孫知府讓幼孤公字之不勸讓每謂人曰成我者裕齋公也關縣尹玉成未第時丁家難母公猶女恆力庇之里居好行其德族喪不能舉曰吾不可為麥舟荒歉有不舉火曰吾不可為晏子鄉儻讓服義聲聞郡邑一時搢紳者碩如尙書何公維柏通政倫公以諒布政劉公士奇參議張公拱辰御史何公宏知府何公派行李公煒進士何公文邦俱修撰詩文投贈然公故寡酬應謝畏途絕聲利嘗語所親曰士遇則駕不遇則蓬吾而完寂葆真敖睨邱壑得以吞吐風雲翕張日月可矣安能動動勦勦羅役於世網邪安能解命殉名聞雞立馬憂讒畏譏同人顏色邪平生稀跡縣庭垂老不知辭訟倘羊盛世以處士終外孫

會仕鑑以謂處士生長先朝嶺海不聞枹鼓吏無虎政閑多滄俗老巖穴不可謂非奉世之佩魚畜犉衣冠輿馬之榮臺榭綺玉之奉甚都也往往蹈危機而來詬訛孰與處士慕義無窮子孫世食其報哉公晚歲自營壽藏斲生棺嘉靖三十九年卒年七十六二子紹奭紹旦紹奭字道卿號靜波事繼母有孝行紹旦字道行號樂槃與兄比德時稱二難

據崔吉本墓表會仕鑑本墓誌從孫讓本行狀

世紀康熙丙申譜參脩

六世愛竹公上林公

愛竹公諱人佐字汝良上林公諱文貴字道顯二公同高祖昴弟平夫公元孫也愛竹父林叟公析產分三子一舊居一小申一學田公闢得其舊見弟微有安土重遷意慨然易居且曰吾

自樂彼風物清曠也上林公居鄉鄙視下言徐終身無迕色議者謂友悌之難久矣如二公者可法也

據世紀脩

六世同川公

公原名文袿更名鐸字道振號同川東昇公長子也充肇慶府庠生改原籍通方汎愛以善交聞

據世紀脩

六世東里公

公諱世芳字時元號東里荔莊公長子也以易補連州弟子員遂研精象數審損益進退之悒醇悃至孝宅考荔莊公憂三年弗御內事繼母任氏母初少恩公率婦關夔齊負引戚見面顏恆以五鼓立寢門奉任起居漿酒醴醢嘗而後進廁牖中帚身自澣洒任負灑埽必躬必親母感至誠卒全天性鞠三弟疾痛

如一身田產弗論也弟世俊等亦事之如父時謂祥覽再生爲小宗宗子飭行爲族人先甘澹泊濟困窮不色吝旣歿而里鄙誦思之同縣登州知府盧宁恆舉爲後進儀箋云

據盧宁本墓表世紀參脩

六世蒲泉公

公諱文重字與充號蒲泉林坡公長子也爲人豁達不墮城府與人交握手如舊識性不嗜酒朋觴款洽必盡其驩委懷觀化偶值葩華春蔓時鳥變聲輒蹶然色喜吟詠甚適視塵鞅羈縻泊如也諸子游庠拔萃登科歷官每吉語到門一笑頷之而已

卒年八十六

據世紀脩

六世白川公

公諱文直字與剛號白川林坡公次子也資稟聰異學無弗闕

尤嫻辭賦嘗習博士家言弗售輒棄去曰士豈必博一第以徼
榮名而取世資爲愉快乎吾以娛吾志耳刻意惇行脩姱必程
於先民家居必稟於禮平心率物爲鄉閭所式事兄文重極敬
愛常同其卧起出入宗鄒讌集必偕無失如司馬光事伯康故
事方公蚤年子尙幼而兄文重已七舉男公弗二視產入鈞以
資膏膳猶子中游膠庠者三舉鄉書者一公責成之力爲多子
讓幼在襁褓公愛而奇之甫受書卽期以聖賢之學曰必是兒
也亢吾宗者比疾革妻郭安人問家事不啻第滸牀摩讓頂曰
事在此兒矣讓後歷官守令治行爲中明第一拜天子璽書之
賜公預決於髫鬣中爲季女擇昏得同縣雲南糧儲崔吉文章
政事皆有聞人推其識鑒嘉靖二十一年卒年四十七公雖雅

志人倫而襟度汪夷有晉人氣韻日科頭坐榕陰與里人羣從
棊枰爲樂歿之日天颶風雨道路斷絕鄉隣奔視含殮不訃而
集者塞委巷云萬曆十一年皇子生加兩宮徽號子讓時官南
京戶部河南司主事贈公如其官

據九江鄉志王宏誨本墓誌金節本行狀世紀參脩

六世上川公

子近池公從祖景第閩愚公附

公諱文擢字與魁號上川公所公長子也操行潔清一介不苟
冰蘖之節老而瘡堅擲研縣魚殆無以過常自矢曰一介何小
萬鍾何鉅其自欺同也古人行事較然不欺其志濫受一文與
索賅千金豈異乎喜吟詠與鄉人士結社分題意興豪逸歲以
九日攜壺登陟舉月泉玉山故事甚自得也子學章字次貞號
近池庠生世其學初與公同時稱詩者有從祖景弟彩鶴更名

璋字伯瓊號閑愚翩翩風雅相繼舉社事嗜好與公同

據世紀脩

六世仰柏公

子沙村公附

公諱文捷字與元號仰柏公所公次子也負才喜任事初太祖定制令天下田多者督其鄉賦稅謂之大戶歲七月州縣委官偕詣京領勘合以行糧萬石長副各一人多者至十餘萬石輸運至京得朝見天子或以人材授官其後需索賠累大戶多以受役破家而其桀黠者又或恃符虐民浮收糧石准折子女攬訟挾持靡所不有故地方皆以糧長京運爲苦南海九江賦役素重逋負山積公受檄管庫者三京運者再卒能芟弊率紀俾公帑私輸兩無廢損議勞賜八品冠帶而還鄉下牘爲官堵塞以捍洪澇里豪怙勢懷私議開舊築公卓見利害率眾上書事

竟獲寢先祠肇建眾議難之公赴義若熱鳩工僦功屹然就緒又置義田興儒學宗人益德之外如葺隄圩脩橋梁籌振恤倡事首功不可枚舉晚築水雲樓以賓接賢士大夫過飲公和者莫不心重公樂與公羣也郡邑再舉鄉飲謙讓不赴隆慶五年卒年七十二長子學敏更名悅仁字次顏號沙村庠生少從順德黃參議朝聘學參議謂其瑰意奇思有聳壑昂霄之志比長以文義知名

據明史食貨志日知錄黃朝聘本墓表世紀參脩

六世捷泉公

公諱宗程字正卿號捷泉綱齋公長子也幼隨父靈川學官任父權尹義寧卒公閒關萬狀扶喪奉母以還體爲之敝性度夷曠里有負忿相告縱所甚不平者公恚曰奚而至是雖甚橫逆

其人愧謝卽已待之若無事時緩急來告必殫力拯助未嘗以
缺乏辭收召後學及所與游之名士餽廩必腆或竭困橐佐游
學費毅然以漢代廚顧自居承訓導公家學習毛詩試有司偶
被放輒拂衣歸不復出然常詔兒輩曰自余先大父以來世以
詩書發聞今余老一壑廢先人詒穀是余罪也汝曹速勵厥志
毋重貽繼述羞蓋其蓄志未抒而欲付於後人也嘉靖四十
一年卒年五十五甥陳克侯曾仕鑑夙爲公賞重最慕思之與人
言輒欷歔出涕其窆也大學士蘭谿趙志皋誌其墓

據趙志皋本墓誌世

七世安遇公見樵公

安遇公諱應宣字以化見樵公諱應陽字以潛皆接莊公子也

安遇蒙難保身得文明柔順之道難後無怨尤亦無餒荏陽陽
若平常人問之迺曰適然之遭祇隨遇而安已耳因自署曰安
遇翁弟見樵孝愛隨兄後性尤澹雅彈棊莖菊以終

據世紀脩

七世粵林公 弟穗林公附

公諱韜字懋光號粵林塢沙公長子也孝友篤誠不省人世有
澆謾事經營數世寢廟口不言勞昆友追隨至於大耋犁肩鳩
杖衣冠甚偉而依戀攜挈如稚時見者每下道起敬比寢疾彌
畱遺屬與弟合塋彌性之厚治命之隆雖古田姜無以過也年
至百歲迺卒弟彤字懋德號穗林年八十七亦有隱行

據南海縣志九

江鄉志世紀參脩

七世石潭公

公諱謨字次臬號石潭蒲泉公次子也性慷慨卓犖負氣節年十七以詩補瀧水廩生嘉靖二十年選貢南京國子監坐監滿中三十一年壬子鄉試舉人三十九年除浙江湖州府通判歷權烏程知縣本府推官越四年棄職歸優游林野十有八載以萬曆八年卒年六十五初公居里塾與陳參政萬言關茂才文仰陳同知良珍鄧茂才進五人結社爲一時學士倡里人爲之語曰洲中人豪朱次臬無窮邊幅鄧九谷雄風激揚陳道襄神姿超趙陳在璞百家雕鏤關丹邱公所居曰大洲故人言云然選人南靡才名益振繇乙科筮仕吳興年四十五矣吏幹老成神明湛定事至迎刃而解大府才之委攝烏程縣事烏程附郭雄緊賦役甲天下公俯循征繕不緩不纏罷民受賜兼權司理

刑讞益平一時三印繫肘叢穴毛集冰解距脫豪猾屏迹久宦越中者自以爲不及也德清胡進士友信未第里居高仇寡諧氣誼獨孚於公公亦度外奇之亡何委解龍衣爲忌者所中遂投劾歸旣歸治第會城坡山五僊觀旁復令子樵完闌虹岡別業日召名流故舊觴詠其中趙文懿公志臬譴官至粵舉浮邱詩社公時時與會又時與陳參政兄弟過同郡黎舍人民表唱和於梅花堂翛然忘老人多以材用不盡惜之同年生陳吾德嘗賦出東門行以贈其辭曰攜手出東門行行日云莫悲風吹我裳况溼泠泠露守者欲閉關行者渺廣路青錢豈足憐王程誰敢誤願言與子偕畏我朋友怒遲遲我心違十步九回顧全州忽已遠河橋忽已度回瞻九霄陌氣結不得訴陳公爲諫官

屢以言事削籍直聲振朝野晚節贈散官賦詩悼公亦自傷也公所著有石潭集

據謝山存稿在璞文稿九江鄉志子宏本墓誌世紀參脩

七世杏林公

公諱諶字次孚號杏林蒲泉公七子也渾樸不斲兄弟八人益以羣從親賓高會多詼諧善謔有雅譚公獨刼刼自持造次必於儒者每當藏鉤賭酒譁笑闋堂或至絕倒回首晚公則莊坐微哂而已養親至孝能餉以色蒲泉公有花石禽魚山水之嗜又喜客傳觴折簡無虛日公先意所適一一羅致而娛樂之不傷其性迨蒲泉公暨母周太君春秋漸高馴至大耋公蚤夜不離寢案兄通判謨嘗曰有七弟在吾於晨昏後至不妨矣蓋喜之也年甫三十絕意榮進不復就舉選社士或邀赴會公不貪

謂妻曰吾當喜懼兩瘞之時豈以三公易一夕哉人田亦田人圃亦圃於何不足而賓客遠適邪從子凌霄謂公為孺子之慕

據從子凌霄本墓誌脩

謹按康熙丙申舊譜蒲泉公七子誥謨諫誥諱詠杏林公諶行次第六而杏林從子凌霄為作墓誌則謂兄弟八人誌內又舉石潭公謨之言曰有吾七弟在吾於晨昏後至不妨矣云云竊意墓誌迺當時撰作未必有誤譜蓋失之或諸子中有蚤殤者譜畧而不數歟

七世省庵公

公諱諤字次和號省庵白川公長子也爲人平直公正益府聘授典儀所典儀正王匾其堂曰親藩禮相潢南道人筆也吾族薦辟起家自公始

據九江鄉志世紀參脩

七世綱庵公

公諱讓字次夔號綱庵白川公次子也幼孤敦敏嚮學治毛詩戴記能躋其精與陳參政萬言參政弟同知良珍從兄謨同學劇切舉嘉靖三十七年鄉試至萬曆二年始成進士年四十矣初授福建南平知縣調繁江西臨川再襄鄉試事作令兩考擢南京戶部河南司主事差權浙江北新關晉員外郎郎中皆在戶部以京察高第簡授四川夔州知府南平當八閩之衝困於供億公務以簡貸息民谿水暴漲壞田廬漂人畜公不埃報碾

放倉粟王者難之公奮曰文牒往來溝壑何賴有謹令自當之無它及也又竭奉錢四賑民獲更生臨川人苦歲運窶者至俵債妻息以應公類其眾姓置一人爲長酌里道中爲儲計畝均輸江航漕輓往來稱便邑有金隄溉田萬頃圯廢百年莫能脩繕公殫力經營靈谷樊水閒功成永賴比遷邑人祝轅若失怙恃其筦戶部也辜權權衡登降偃僂與傭卒襍作胥吏莫能爲姦差督浙關捕貪疏磔宿弊汎埽暇則校士武林指授經義名士多出其門其守夔州也請巡按行一條鞭法瘁心贊畫官民帖帖不佞張而事集會大旱精誠露禱勵二日而雨霑足夔人嘑爲朱水鋸笛尺書躬親料量勤幹爲列縣表率數月而夔大治頌聲謹騰院司交薦於是天子欲大用公降璽書勞曰朕撫

有方夏軫念民艱每思良二千石布德宣化嘉予天下維新而於典郡尤亟其有治行明章薦剡茂騰者特簡其人而畀之以旌前勞而勸來勸璽書豈有愛焉爾四川夔州府知府朱讓惠從公溥威以廉生著鉤距撻伏之神塞奔競夤緣之竇薦書特最朕用嘉焉茲授爾階中憲大夫爾膺茲榮寵益當勵報稱之能果其績並龔黃將採一郡之政成而召卿矣子大夫其敬承之公遂入覲旋至公安偶疾憩驛喟然曰余甲戌場前夢蠶滿衣襞蜀古蠶叢地也余子次夔今次夔矣遽引疾歸公爲大宣髮廣額目秀而慈未嘗示骯髒之色與人言不衣而暖然通而有執宰邑時張居正當國政尙嚴急有司迎指慘礫少恩公力持大體除苛解嬈人用人和及在曹司內閣申時行余有丁蓋

反居正所爲一切縱弛公數執法曰江陵特主持太過耳其綜覈名實是也蓋公爲政無心寬猛亦不尙苛廉志在調劑時宜拯民疾苦使廬井見生人之樂故在政不擾旣去而民慕思之當官畱都澄海唐吏部伯元喜講學順德歐工部大任稱詩公則多談吏治三人交莫逆而趣尙不同大任嘗語人我輩喋喋寧如倉曹能及物邪倉曹公攝職也其爲名流推服如此旣歸召補湖廣鄖陽知府不赴中外交章以用不盡才才堪大受薦有旨撫按促赴闕卒不起惟日以福惠鄉閭爲事濬渠築筧治竇成梁惟日不足福巾生衣與野老踞坐榕陰驩話疇昔見者不知其曾官中外顯僚也萬曆三十二年十一月卒年七十祀南平臨川名宦府縣學鄉賢夔州專祠崇祀至今公卒四十六

年以孫實蓮郵典推恩諭祭贈兵部左侍郎初公江西所拔士
陳邦瞻天啟紀元總督兩廣拜公祠下周厯堂皇泣然流涕題
循績高風四字而去時謂實錄陳公高安人厯官中外鯁亮有
大節爲時名臣

據四川通志廣州鄉賢傳廣州府志南海縣志九江鄉志世紀參脩

七世後溪公

公諱學濂字次周號後溪順川公長子也以詩補邑弟子員博
學篤行研究經史每得其要歸遠近士奉爲指南偃蹇諸生十
戰棘闈不遇未嘗損慍及仲子筮仕拜封諸孫繼迹科名家聲
驟赫亦未嘗加喜日逍遙杖屨諄諄以忠孝大節訓子若孫貞
不絕俗通不易方巋然爲邦邑典刑里人蘇允隆年百有七歲
鄉毗樸實時邀至飲食勸酬示優老風指劫盜就禽亟白令禁

讎扳釋冤磔人尤德之萬厯三十一年以子凌霄封湖廣咸寧
知縣鄉後進黎刺史春曦嘗著論曰凡封翁多以子貴若公則
不以子貴也豈惟不以子貴又能貴其子貴其孫復孫而未有
已也時以爲知言卒年八十七著有經書講說燕居日錄逍遙

齋稿行於代

據南海縣志九江鄉志世紀參脩

七世龜臺公

公諱學懋字少脩號龜臺順川公次子也幼嗜學十歲能文衣
冠齊邀與常兒異弱冠充郡庠生提學臨試與兄學濂迭爲冠
軍時稱朱家雙鳳久困場屋物望益隆名士多負笈請業公學
以靜專爲主淹貫經史鑽研性道尤教人服膺禮法遇吉凶時
節一以司馬書儀考亭家禮爲職志小大由之方親迎時所親

皆言會典許借用冠服公謂非素位義堅不肯從俗爲一變前
後執親喪哀毀泣血負土成墳手植松柏雖近六旬崩殞猶昔
平生爪甲須髮脫落皆珍爲遺體無敢遺也預刻亡日將易簣
疇子婦諸孫來集榻前涕淫淫下以先壟未脩爲言兄學濂至
日塋石已備期已卜矣何憂領之而瞑時萬曆三十三年十二
月也年七十著有朱氏家譜初上沙朱氏啟族逾三百年而家
業未立公念諸兄多宣力四方王事鮮暇其少者又當閭脩攻
苦蠹沒科名迺慨然自以爲功排比撻羅勒成卷帙文獻不墜
至今賴之公家門鼎盛獨能以禮自律凡子姓中華侈輕悅者
弗敢近也

據九江鄉志兄孫光允本
墓表康熙丙申譜參脩

謹按士昏禮主人爵弁纁裳緇袍從者畢

元端乘墨車從車二乘執燭前馬鄭氏注
云主人壻也爵弁而纁裳元冕之次從者
有司也乘二車從行者也墨車漆車士而
乘墨車攝盛也朱子曰昏用命服迺是古
禮如士乘墨車而執雁皆大夫之禮士昏
禮謂之攝盛王氏復禮曰昏禮攝盛載之
儀禮歷歷可稽如士家祭用元端助祭用
爵弁今親迎爵弁攝盛一也大夫墨車士
棧車今乘墨車攝盛二也大夫有二車士
無二車今從車二乘攝盛三也特牲禮陳
鼎不在東方避大夫也今陳鼎於東方北

面攝盛四也贄大夫執雁士執雉今壻入
奠雁攝盛五也凡婦人不常施衽之衣今
用純衣纁衽亦助祭服攝盛六也同牢而
食腊必用鮮魚必用鮒攝盛七也按明會
典庶士昏禮納幣章服一稱旼九品親迎
許攝公服蓋卽古人攝盛遺意龜臺公顧
自安素位執不肯從於禮雖若稍過然未
俗僭踰昏喪爲甚公弱齡彊立固已志在
防民躬爲砥矢矣

七世粵軒公

公諱學度字越伯號粵軒捷泉公次子也性好施予能容物雅

有父風未老而鰥不復言娶獨居者十餘年喜飲酒陶情而已
不輒醉蕭散夷猶與物無競簡遠如晉宋閒人萬曆二十四年
卒年六十二

據曾仕鑑
本墓誌脩

七世性庵公 子太赤公附

公諱學業字兢伯號性庵靜波公次子也貧而耽讀竭力將母
未嘗遠游因得顓邃於學經訓史部咸有條貫确然自名其家
性和易喜及物里有紛爭緩頰解之頑不可化援果報動之有
夜竊公起曰汝持去勿再來盜因改行有貧婦窘餒將自沈傾
囊濟活胡貢生斯覺年方舞勺一見決爲名士以女妻之晚年
散慮逍遙逢里塾輒入以勉後生詼諧縱誕從衡貫串皆激厲
意也聞者悅而易入詩詞矢口而成得堯夫白沙遺韻終老儒

素貧且賤然以宿學爲鄉望所歸其祝齡也薦紳先生及諸文學繪鹿門偕隱圖爲壽卒年八十一著有詩經正義四書主意諸史斷釋藏於家仲子儒桂字宏芳更名之煥號太亦蚤游番禺庠久不第學行肖家風

據九江鄉志脩

八世君倫公

公諱名臣字君倫鳳吾公子也少喜讀書忼慨慕大節所交多奇材劔客習知兵畧爲人饒膂力善騎射翹關負重之技不學而能崇禎初流寇大起中原久不見兵革名城阨塞賊至輒糜於是天子慨然發憤思得爪牙折衝之士而用之十年遂詔天下府州縣咸立武學置生員提學官以時掄補如校士例公出首膺高選充番禺學武生然是時尙文輕武結習積重不反士

之以兜整進者雖至專闢大帥恆鞠脛拜起於文吏之庭趣走與儼從等文吏益倨侮盱衡厲色甚或剔髑而陵藉之不以齒於人公又恥之奮然曰吾獨不能捉三寸不律與若輩一角短長乎十五年壬午鄉試願就文闈提學吳公禎啟覽其文大賞異錄送科舉三場完竣改充番禺學附生居二年闖賊陷京師莊烈帝殉社稷信至公涕泣不自勝所親或慰之搯窬言曰人誰不死得死君父卽屬考終惜吾位賤無階拚七尺爲朝廷脫獲一旦便當血濺沙場肉餒鳶鷂報累朝養育恩耳安能做伏波老子媻媻求馬革裹尸歸葬哉又曰名臣韋布諸生耳誓與學校相終始終不令陳東歐陽徹輩地下笑人聞者皆悚息乙酉丙戌金陵福州相繼淪沒閣部陳文忠公子壯迺與廣督丁

魁楚西撫瞿式耜謀奉永明王由榔監國肇慶王使閣部提督江楚閩廣軍務特勅吾家在籍戶部郎中微龕公實蓮團練水陸義師副之故輔蘇觀生懷貳別立唐王弟聿鏘於廣州人士多踊躍待用公止不行廣州旋為

大清兵襲破聿鏘執死丁亥六月陳閣部與微龕公移檄遠近圖恢

復舉義於鄉語具微龕公傳閣部我所自出少長於吾家習知宗人賢否微龕又公從子行也均最知公幕府初建遂與鄉文學吳兆健同參軍事文學閣部年家子謹按九江鄉志吳兆健進士羽侯仲子亦

奇士也時義旗四唱陳忠愍邦彥起順德張文烈家玉起東莞及新會王興潮陽賴其肖等後先赴難咸推閣部為盟主百穴蝟集凡選鋒銳籌饋饗聯聲勢募閒謀敕鎧仗庀舟輿兩人贊

畫為多廣州師衄退守高明閣部奏署公儒學訓導協守危疆九月

大清兵偪高明攻圍五十日西師救援不至城遂陷方事急時或謂

公拒守非王名可跳免公正色曰是何言此日之難獨斷於中久矣况既服王官乎且何以謝吾戶部及閣部公督禦益力十月二十九日城潰不屈死之吳君攝教諭同日死明年江廣反正優卹建義諸臣有詔覈取同事職名一體褒錄方在察議屬廣州再陷卹典竟不及據明史選舉志世紀採訪冊參脩

八世淇源公

公諱大仕字宏通號湛源雁屏公長子也雁屏公諱建中字次端不仕龐戶部景忠謂其不出庭戶而化及鄉邦自足於邱園

而名重於卿相以隱君子終公少篤學博極羣書補邑諸生試
有司輒高第操管爲舉子業俯視流輩有杜必簡之風旣數奇
不售迺效伯居陶朱居積致富以貲雄里中家溫而好禮年耆
而嗜學訓子孫原本經術子貢生光瑜庠生光璫各有聲於時
孫官銘以才諳膺薦辟有旨驟擢推官餘多居膠序者故世言
善教必首公壽介百齡聰彊不衰時時爲後進譚經史之要每
會講音吐鴻鬯須髯奮張坐起數十巡無勅容侍其坐隅者人
人得其意以去謂如撰杖於申公伏生之側堂室之間熙熙穆
穆不自知其不生千載以上也預營生壙勒卒期至日一笑而
逝年九十八

據南海縣志九江鄉志
關家炳本墓誌參脩

八世攢雲公

公諱樵字叔祥號攢雲石潭公次子也順德庠生幼才慧器識
不凡浙中趙文懿公志臬見所爲文翰丹青大賞異之家有虹
岡別業園亭古曠草樹莖莠名花奇羽畢萃日榭戶焚香著書
暇則與弟完及從化劉克治克平伯仲尋幽覓契弦琴詠詩爲
樂餘事不挂眼也一時名流想望丰采歐先生大任告歸年已
七十巋然爲嶺外風雅總持每造公譚讌忘晷常舉唐高適句
曰嘗與天下士許君兄弟賢再三不置論者謂惟公克副品題
玅擅六法蘆雁筆意尤工藏弄家以爲邑人林以善無以過

據歐

虞部集九江鄉
志世紀參脩

八世白岳公

公諱完字季美自稱白岳山人石潭公三子也時徽人詹景鳳

東圖擅聲書畫工著述與公同亦號白岳山人故天下稱東圖季美也或以山岳海岳嘯別之公姿敏好學文辭翰藝冠一時年十七充廩膳生繇順德改邑學皆第一最爲蘭谿趙文懿公志皋父友黎參議民表歐工部大任所愛重引與抗席嘯小友石潭公宦成治第會城坡山之陽公兄弟又築北郭虹岡別業有清暉師古巢雲諸精舍並築環谷山莊皆隨盤陀高下間以松栝梅桃脩篁萬挺蓄古書畫鼎彝日優游於辭翰茂林粉黛閒才名奔走海內兩臺司道郡邑長吏及往來使君若尙書靈璧劉公繼文通州陳公大科布政仁和胡公心得太常晉江王公用汲太僕永春李公開芳冠蓋日絡繹於門陳公聘脩粵乘及許氏說文徐氏初學記李公聘脩石室志胡公聘脩草堂詩

餘諸書嘗度嶺歷衡湘臨洞庭尋荆襄江漢爭戰故墟憑弔興亡之蹟浮江踰淮至廣陵鍾吾反觀金陵宮闕南訪姑蘇臺探禹穴觀潮於錢塘徧覽浙東山水括蒼天姥雁蕩龍湫天台石梁一一窮其幽勝逡巡循閩嶠而反足跡半天下到處鉅卿名彥爭逢迎交驩京山尙書李維楨聲華蓋代淮上傾蓋謂公兼名士所長永嘉布衣何白氣高無所讓獨推挹公筆花墨瀋寶貴一時山岨海澨駱越雞林靡不爭求手蹟當盛年車馬雜沓歲費數千金而緩急時有家人或數米而炊公視平等觀客至無貴賤必款門人林穆七喪不舉罄貲襄事戚故待舉火者恆伯什家中歲不第輒棄去不復試有司選貢國學謝不赴時以爲高而非公指也嘗爲友人鄧虞一賦嗇如園見志其辭曰鄧

伯子南陽華胄駿發郢都勝情天逸標韻風疏游心物始獨與
道俱爰作羨圃於焉考廬仙的聳虜北牖神瀆涌於南除覈玄
旨於柱下錫嘉名曰嗇如客有過而諗之曰吾子負韜物之雅
量懷高世之英圖將逖覽虜八荒胡削迹於一區吾將進子以
游觀之邈樂華詭之極娛發子之覆子欲聞虜不腆大楚實曰
奧區玉衡鶉火之次赤館朱陵之墟左獵雲夢右眺荆巫棗堅
策肥載馳載驅窮日不足卜夜有餘奈何跼踏蓬藿之下若櫬
株拘精疲於祕典神葢於玉書胼胝皸瘃無迺憊歟伯子作而
言曰噫噦若客所言馳騁之娛亦奚以爲吾想夫蚡冒之奄有
楚國也肇土畫疆篳路藍縷作法惟涼土木之侈溢於後王渚
宮鞦韆章華鏘鏘層臺九仞飛觀百常翼藻稅以橫鶩跨雲棗

而高驥被翠羽刻龍章挂曲璫綴明璫裂縹錦兮繡文埒規雄
虹兮嫋飛梁復有祕閣邃闥曲榭迴廊或涼或燠乍陰乍陽誇
大蒐於夢澤詭豔辭於高唐俄代謝之忽及慨榮悴之靡常紅
蘭旣化白露爲霜玉鬢蓮礎灌莽荒岡詎若吾廬挹清飲爽雲
霞在衣風泉落掌冥觀則萬古崇朝卧游則十洲函丈几上獨
嗒然而噓空中契泠然之賞及夫譟扇舞衣裁統列綺淫冶繁
華韡如桃李結幌流蘇千重步障紫絲十里綵繚七寶之襦纂
組五文之履舉華袿兮光風迴動凌波兮香塵起忽寒暑之迭
更亦煙銷而雲委莫不感行樂於當年傷流光於逝水余方攬
辟芷以旌潔擷畱夷以信芳揉秦蘅以紉佩集芙蓉以爲裳散
芳襟於華薄蔭翠幄於朱楊叢桂發小山之馥猗蘭吐大國之

信夫薄榮觀而燕處其樂洋洋者矣又若舞按陽阿聲徵北
里激楚迴風前谿白紵含宮咀商變以流徵啟朱唇發皓齒采
蘼蕪於山閒詠芍藥於溱洧已而曜靈西匿戢暉濛汜逸響與
梁塵共滅玉質偕訶臺俱圯余方振天籟於空谷舒鳳嘯於中
林擊泗濱之浮磬撫彭澤之素琴泉叩牝而諧調風振杪而蘇
唵豈羨夫驚心動魄桑閒濮上之音哉客曰唯唯否否蒙竊未
通方今聖明在上如日方中懷才抱道之士叩叩顛顛若脩鱗
之赴巨壑鴻毛之遇順風先生渺論若高蹈之義則獲而兼濟
之道未宏也伯子莞然不奮抗音而訶訶曰治人事天莫如嗇
兮蚤復重積無不克兮無不克兮莫知其極兮客起而謝冷然
若灑迺知先生非忘世者公秀眉目切切聲玉色談笑有醞藉敦

門內行色養石潭公林下父黨咸曰有子兄宏蚤歿與仲兄摯
愛形影必偕嗜朋友如性命傾倒曲盡不肯爲貌執加藝能足
自振故爲四方士友所歸先是明初五先生孫蕢王佐黃哲李
德趙介稱詩結社於廣州南園迨嘉靖閒社廢園荒歐工部有
五懷之作因與黎參議暨梁刑部有譽吳僉事且李兵部時行
復恢前美聯吟於抗風軒世稱後五先生它如王光祿漸達倫
祭酒以訓勅越山社郭光祿棐王御史學會倡浮邱社羽翼稱
盛洎神宗中葉公遂與順德潘太學豫之子朋梁布衣有謙公
益歐貢生必元子建躡武而起推襟送抱社事大昌工部雖老
矣猶時時與會嶺海名流如香山李文介公孫宸伯襄番禺韓
節愍公上桂孟郁同邑萬貢生國楨伯文新會林按察枝喬陽

仲番禺羅同知賓王季作黎貢生邦璘君璽李茂才雲龍烟客
 從化劉選貢克治季德茂才克平道子皆社侶也公鈞與莫逆
 厥後諸人榮落不同交有終始當世以為美談為古文刻意新
 裁詩自然為宗高妙者到古無讓書駭眾體八分擅一代嚴整
 清勁獨步萬厯閒遺墨最富其摩厓劇蹟則端州石室羅浮逃
 庵諸刻海宇樞拓照曜至今時有馬元震者欲與爭名評者謂
 其體勢多怪不及也畫理入能墨竹與萬國楨齊名自謂得玉
 局遺法萬厯四十五年五月卒年五十九所脩官書外著有虹
 岡漫錄續錄清暉館稿白岳山人全集行於時據書畫譜書家列
傳畫家列傳
欽定古今圖書集成字學典列傳藝術典
列傳書史會要畫史會要明畫錄古今能畫人姓名錄羅浮山
志七星巖志廣東新語粵東文海粵東詩海歐虞部集球玉齋
草廣東郭通志南海縣志九江鄉志子端履等本墓誌參脩

八世赤城公

兄孫峻閣公附

公諱建勳字文祥號赤城石潭公四子也原名弁就武科更今
 名毅而能擾蚤選材官累中萬厯二十二年二十五年四十二
 年三科武舉授北直隸西山營守備地控畿疆姦宄踰集二
 詰盜咸有功勩號為能官兄樵完皆通人上材以文義伏一世
 為時聞人公退就右列亦無甚媿焉明白太祖吳元年下文武
 科取士之令而武選卒未定制憲宗成化十四年始設武科鄉
 會試嗣後或六年三年舉行條罷條復爰逮末季載祀二百鄉
 人登是選者屬三人公與兄孫夢偉頓居其兩物罕見貴里鄙
 榮之謹按九江鄉志明武科朱
建勳朱夢偉岑壯圖三人夢偉初名如林字從翰號峻閣
 文屏公孫自吳公子繇行伍中萬厯四十三年四十六年兩科

武舉授廣州左營把總終官惠州白雲營守備

據明史選舉志
九江鄉志世紀

脩參

謹按世紀峻閣公繇武舉授廣州教場左
營兵務把總累陞惠州白雲營守備宦履
甚明而康熙丙申舊譜宗圖勵注兩科武
舉亡五字殊漏畧失考

八世莘犁公

公諱田字可易號莘犁綱庵公長子也生而敏達折節下士不
以貴介上人弱冠補邑增生屢試高等攝縣劉公復初錄科首
拔爲詩文筆不加點無言苦思艱態五試棘闈不售棄歸侍養
輕財愛客無貴賤少長皆昵之與之游揮塵譚元累月不厭子

第輩上公車每勛以交名賢眺名勝爲急歸日輒問得友幾何
遨游何若偶副中懷蹶然神逞芻豢無其旨也督學會公化龍
給冠帶表其閭曰承先啟後晚歲怡情絲竹脩謝傅東山故事
遠近名山水行跡幾徧雖屆稀年筋力不勦花月清宵每嘖侍
兒數輩挾笙瑟隨行恣意所之謂人生幾何行樂當及時庸可
對月鼾睡邪崇禎十三年卒年六十九卒後六年以子伯蓮贈
中書科中書舍人初綱庵公休居有家法公弟疇儒行清嚴非
禮不履公坦懷樂志曠達任真論者謂昔宋氏景文元憲趣尙
各異而各負時名公兄弟畧似之甥大學士陳子壯書陶寫堂

以贈

據九江鄉志
世紀參脩

八世箕作公

公諱疇字可敘號箕作網庵公次子也謹按公行雖次以嫡子承祧幼而徇

齊長而端亮簡嗜欲寡言笑杜門讀書里中罕識其面年十五

補邑廩生試必冠軍秋闈十三次無勸容萬歷四十三年乙卯

詩四房中雋既迺失之督學張公天麟獎優行第一制府張公

鳴岡聘操選政評騰甲乙名彥推服守道魏公守忠詢采地方

事宜公臚陳啟事侃侃數千言皆石畫當事一一舉行里人梁

妃慶妻周氏夫墮崖死茹蘖養姑姑歿貧無以瘞並夫極焚之

薪火既熾投烈焰中死關沛妻朱氏即公祖姑苦節著聞語詳

後傳二氏未邀旌典久鬱眾心公慨然獨上其事邑令陳公儀

親表門閭鄉人感竦啟禎以後物望加隆德行文章士林北面

開中憲祠即家講授遠近士雲集莫不以通經學古為高其莫

齒也襟度簡遠不樂羶要地崇禎十三年子實蓮令德清迎養

再三公勉就道一覽吳興山水遽賦詩曰攬勝來游雪非緣問

俸錢未曾經累月似覺已多年閉戶看山近擔泉省驛傳奈非

吾土也歸思日來煎會實蓮得臯遂拂衣歸歸後五年卒年七

十二封浙江德清縣知縣卒後二年以實蓮卹典推恩諭賜祭

葬贈兵部左侍郎平生撰作致多篇什尤富所著期適亭稿駿

發閣集鄉邑志乘鈞經著錄丁亥家難散佚罕存據大清一統志廣

州貞烈傳廣州府志南海縣志九江鄉志世紀
兄子協蓮辛丑詩鈔跋來孫天瓊本墓誌參脩

謹按九江鄉志廣州貞烈傳作梁妃慶

大清一統志廣州府張志南海郭志

作梁紀慶 大清一統志廣州貞烈

傳九江鄉志作慶墮崖死廣州府張志南海郭志作外商回抱病死 大清一

統志廣州貞烈傳作慶妻關氏廣州府張

志南海郭志作周氏鈞未詳孰是九江鄉

志於公傳作周氏於貞烈傳又作關氏更

屬兩歧今莫定指歸姑從鄉志公本傳

八世則明公

公諱賓揚字可言號則明綱庵公三子也原名甸以詩補縣學

弟子員為人不畏疆禦赴義必先里有善端惟躬是瘁家富聲

伎公鴻飲高譚妙析音律有周郎顧誤之風

據世紀脩

八世懷玉公

公諱峻字可周號懷玉綱庵公四子也姿敏讀書過目成誦出

試郡邑輒拔前茅願不役役名場築臺榭蓄書畫日與宿士名

流開尊驩笑琴誦酒賦照暎一時客無榮悴新故造請如一既

無乖厓亦無苛縟坦夷徑遂人人得其驩心子弟有秀良悅學

者齒牙不惜賓筵禮侑酌月觴花必招與銜栢明示優寵以故

卑幼羣樂趣之公宦家子羣從世席科名姻婭並多膺仕獨安

澹泊以山人終老由由家街閒見者不知其為貴游士也黎州

守春曦每以隱德推之年四十九崇禎七年卒

據九江鄉志世紀參脩

八世石室公

兄紫閣公從父昂弟清揚公附

公諱遐原曰必遐字叔華號石室沙村公四子也充西寧庠生

博洽多聞論列今古事證據紛綸關節疏解瀾見是非質的畱

心鄉邑利害李村圍興築改入海洲大隄實慮始首功著有九江鄉乘草坳累年以謂嶺以南冠冕南服者南海也冠冕南海者九江實稱最唐宋以上風氣未舒明興垂三百年政教淪洽天地清淑之氣與時俱隆品物亨嘉人文斌蔚號稱極盛曩令佚而弗傳散而莫收非所以彰信後今光揚在昔者也其稿經亂殘闕黎州守春曦竟因其遺緒勒成專書論者謂一方文獻不墜益光繫公先河之力晚作嘯園名流賦詠幾徧年八十六卒同時棲遲三徑而名播士大夫者有公同懷兄必逾從父曩弟必顯必逾字叔超家有紫閣山房因以為號頽年乏嗣徇羊無悶觴詠自如韓節愍上桂劉方伯觀光咸有詩許為曠士必顯字宏明號清揚惠谷公三子有娛暉館種月亭諸勝關刺史

管恆過從譚謙信宿其家

據九江鄉志皆山樓集參脩

八世太一公

從祖曩弟靈一公附

公諱凌冲原名必遇字宏會號太一後溪公長子也讀書能究本原後溪公許青錢選年四十始籍邑學增廣生五困場屋卒不售第凌霄子光祖猶子光允高科繼武公下帷蔬素無數其初惟以報稱國恩日相敦勉或宦游在遠手書拳屬必極提撕與配關孺人伉儷相莊失偶中年終身不續子光祖彊直當官與時齟齬報遷揚州郡副公即以善養為言誠不復出其澹寧止足亦天性也天啟初以光祖封廣西融縣知縣年八十四卒公門風愿樸家無敖民從祖第弟之麟易直子諒尤與公為近之麟字治昭號靈一會溪公子也

據九江鄉志世紀參脩

八世湛一公

公諱凌霄原名必迪字宏惠號湛一後溪公次子也少負才練識爲學喜講求實用不爲聲貌浮辭絲郡增生中萬曆十三年乙酉鄉試四上春宮在公車十載選新興教諭聘充丁酉湖廣同考官擢湖廣咸寧知縣薦剡三上遷雲南寧州知州三十三年內艱歸三十七年起山東平度知州未任左遷貴州安化知縣秩滿士民萬眾乞畱奏入上嘉悅特晉定番知州治邑如故四十三年父喪解職四十六年補知平度州署青州府事憚忤者沮之謫江西贑州通判居三載以天啟二年謝政歸方司教時苦心誘掖務宗經訓卻贊譚藝古道相勸諸生嚴而愛之高要商苦官累於郡賴公一言而釋其宰咸寧也力爭稅監糧運

之擾值朝廷用師討播縣當其衝公劑量有方饋饟不加播師宿飽武卒罷毗調馴惟允治行爲楚中第一當內遷矣邑有鄉宦趙孟徐三家皆黷貨勢張甚監司莫敢迕公毅然曰朝廷設令衛民顧剝民以事大官乎卽摩厲鋒距以待豪彊屏息三家銜之趙尤憾遷寧州再補平度忌者猶不悛公建江橋功甚鉅會趙爲吏部索蚨不應遂齟擠安化安化新造邑也前令多畏藉言廨舍有祟不肯居公曰妖不勝德卒居之大府議徙邑治公殫力經營衙倉庫獄七十餘閒官錙不足出俸佐之方當營繕又襄辦涪州王木三載購劇材過千役歲而民不擾涪人亦受其賜安化戍卒以橫悍病民導苗突劫或呈俵遺棄以蔽辜公白兵備劉公嚴失事之罰犯無赦兵苗獲戢邑歸無甲科貴

仕公政餘督課孳孳講授邑人田仰遂階上第位台司陋風不
 變蓋公為吏嚴而不殘不屑鋪張吏事一錢無所私利興弊革
 視官猶家也民亦親之如所生當神宗之末徵發頻仍礦使四
 出海內騷然煩費州縣不能舉其職加以胥猾舞文豪紳兼并
 考課殿最一切虛文從事不復加意循良之選吏治日以益偷
 安化乞畱疏入天子慨然用先朝史誠祖李信圭故事優獎之
 海內喧嘩傳為異數謹按明史循吏傳縣令去官因民情使復
 留者永樂中史誠祖擢濟寧州仍視汶上
 縣事正統中李信圭擢蘄州清河民乞畱命以蘄州理縣事其
 餘邵陽令孫浩長清令薛慎內邱令馬旭桐廬令楊信北流令
 李禧等或考滿復畱
 或加秩還任而已命既下邑民驩聲雷動人慶二天當是時
 安化縣之名聞天下榷關贛州有閩商於江中溺金百錠無賴
 篡之越境來訴公責還之商感激奉其半為公壽不許迺飾諸

潭廟為公祈福仍立石廟中凡公所涖不求赫赫名而去後輒
 見思新興安化成鏤碑頌德任安化較久謠思至今尤負識鑿
 楚闡得張邦翼穆天顏王同謙皆成進士歷官有聲咸寧得趙
 嗣芳寧州得張正道劉廷祚並躋通顯其餘翹秀興起公振拔
 為多歷仕三十年所居屬蔽風雨室無媵侍門無雜賓暇與兄
 凌冲酒栢晏笑白髮扶將或二三耆舊清言遣日而已崇禎十
 二年七月卒年八十二公居鄉愛利之澤與在官同計偕時里
 人陳貞伯誣陷大辟糾同年生曾仕鑑雪其冤鄉瀕海多盜當
 道奉公為約長俾司化導公輯會約一書歲時會老幼申明之
 得呂氏藍田鄉約遺意窮欄疾苦知無不言宰邑者皆嚴重焉
 里人受蔭垂二十年羣樹闕於其居第前日表正門比卒皆咨

嗟流涕云

據貴州通志南海縣志九江鄉志世紀田仰本墓誌參脩

謹按貴州通志南海縣志本傳但載公宰安化事未詳歷官層節九江鄉志選舉條謂公任寧州知州丁內艱服闋授山東平度知州未任改貴州安化知縣陞定番知州仍管安化事丁外艱服闋補贛州通判而本傳則謂內艱起調安化考滿士民乞畱撫按題奏得加定番知州仍掌縣事外艱起補知平度州改贛州水利別駕均似遺漏蓋選舉條於外艱起時闕補知平度州一節本傳於內艱起時闕授山東平度

州未任一節也然本傳於外艱起謂之補知平度州則前此曾授是職可知特終不如田太保仰本墓誌再補平度州五字之分曉耳公前後兩次謫官之繇墓誌謂趙紳居吏部索蚨不應遂齟擠安化鄉志本傳謂補知平度州新冢宰苛求交際改贛州別駕雖似歧出然參觀互證亦可見公疆項終身夷魚比節矣至於公署青州知府見於公祭陳淇涯司馬祀鄉賢文見於祖祠恩光錄見於公里第明崇禎間匾額臚載甚明鄉志偶畧

八世惺字公涵字公

惺字公原名家顯更曰繼鳳字青陽粵軒公長子涵字公原名家榮更曰繼芳字肖恩粵軒公次子也惺字涵字其自號惺字又號五如幼爲季父保昌司訓碧潭公賞許比冠綜羣書攻二戴萬歷初羅旁山寇平詔以其地爲羅定州置東安西寧兩縣徵廣州高才生興起學校於是提學支公可大首拔公充西寧庠生陳公璧繼授廩餼才譽播一時公不以文藝先行誼安覲梯長倫物惇飭世父萊洲公年迫頽侵兩子蚤世公以事父者事之日有三朝之禮偶旼疾奉衾嘗藥偶影不離旼餼西寧庠弗獲起居眠食常悒悒萊洲公迺改博士籍就養焉從父夔州公養重邱園公侍譚恆竟日夔州公嘉其力能體驗嘗與弟繼

芳從祖舅弟田疇甸峻刑部黃公應舉孝廉鄭公融結雅言社於牛山麓蓋江寧余祭酒孟麟所題繹思堂處也望實克收砥礪彌厲公尤耽讀泊老手不釋卷爲邑士所師八戰棘闈無所遇奄及歲薦竟以萬歷四十二年卒年五十五著有詩賦全集鄉先達曾公仕鑑奇愛之涵字公弱齡特達性樂酒德然故無曠事亦補西寧庠爲督學羅公萬程首選社中尤推氣誼拂違肯穀往往旼猶同胞它如存卹窶貧營治寢廟皆力尸之爲約長二十餘年里毗懷德年五十七天啟三年卒

據世紀黃應秀惺字公墓誌從

子伯蓮涵字公墓誌參脩

謹按惺字公原名家顯涵字公原名家榮

本墓誌及康熙丙申舊譜俱失載謹照世

紀增人

八世海玉公

公諱家聘字肖湯號海玉粵軒公三子也資性孝謹兩兄籍諸生伯且候貢矣公學且試弗售輒廢歎曰親年寄耳共為子職寧必祿養云爾乎吾翁嗜酒儻得子母錢成足吾翁杖頭費鄰下盡驩吾願畢矣於是辛苦治家人產豐實日聞粵軒公迺娛情醉鄉陶然忘老公雖勦業艱勤喜周急若饑渴荒歲為糜鬻哺餓者存活孔多殖嘗田聘名師歲費無恡色維時門宗貴盛科第相望明經文學常數十輩靡不稱公善治家是亦為政云天啟五年卒年五十五

據曾陳詩本墓誌脩

九世見庵公

公諱端揆字有道號見庵白岳公次子也清高曠達而能不愛勤勞服官尤惓惓累擢唐王府護衛指揮使司指揮使福州淪沒隨唐王聿鏘間關至廣州王特疏保薦云此一臣者在本藩下效勞日久患難最深忠誠不貳事主無欺繇閩相隨入粵彼晨夕扈從櫛沐宣勤為長史諸臣弁冕云尋敘勳予世襲護衛指揮同知

據世紀黎春曦朱護衛脩復高泉井記參脩

謹按明史通鑑輯覽南疆繹史諸書唐王

聿鍵立於福州封其母弟聿鏘為唐王

大清順治三年秋九月 大兵下汀

州聿鍵就執福建平報至粵中總督丁魁

楚巡撫瞿式耜巡按王化澄等與粵中故

臣以十月十一日奉永明王監國肇慶嗣
司禮太監王坤至自汀州知聿鍵已殂羣
臣遂請卽位福州舊輔蘇觀生貽書魁楚
欲預擁戴功遣主事陳邦彥勸進魁楚與
觀生素不協拒之適唐王聿鏗自福建浮
海至十一月癸卯朔觀生與布政使顧元
鏡總兵官林察擁聿鏗入廣州城自立改
元紹武遂日治兵與肇慶相攻云云今按
世紀見庵公事蹟迺錄唐王保薦劄子蓋
其甫至粵通奏肇慶行在而未爲蘇觀生
等擁立時也

九世庇亭公

弟毅庵公附

公諱協蓮字子勳號庇亭莘犁公次子也生有雋才比冠補邑
諸生文譽與諸兄埒中歲爲鄉約具矜高猥陋庠俗憎焉亦以
執理爲奸僉所忌順治十六年六月三日里豪關公性購賊關
阿蘇糾黨焚畧其家戕家口九人妻盧氏妾周氏李氏女十姑
細姑嬖姑媵婢張繡雲同時罵賊殉節比隣昆仲遭畧一空有
被創者盧氏等七烈之名震耀至今自有傳公難後志存養晦
時然後言不踐過失之地鄉人卒刑式恃賴之詩才豔發清潔
華紗一門風雅中推白眉陳文忠公子壯許爲才兼庾鮑謂後
來之秀也自甲乙變亂以後世屯家旣遭際益艱從前羣從唱
酬之盛或身蹈國殤或沈薶江海風流邈不可追迺壹志蜚遯

不復從事帖括於是祖述風騷流連八代有所感觸一一見諸
詠歌尤工五七言唐律體每一篇出時賢競傳之又妙擅臨池
遇有誣諉簡牘悉自寫其詩作者之名藉甚士夫間猶以文忠
故也時而吟嚶若呻所痛含情楚雨哀音微茫評者謂得風人
之旨集多殘闕惟依園詠一卷存書入能品行草有文董格法
人尤珍之弟儀蓮字子習號毅庵忼慨敢任多藝能亦蚤籍邑
庠舉優行

據世紀黎春曦
依園集序參脩

九世微龕公

公諱實蓮字子潔號微龕箕作公次子也願身頰面角犀隆起
腰腹十圍少須麋大音聲顧盼偉如神人七歲能屬文與姑子
陳文忠公子壯並有聖童之目未冠繇邑廩生舉天啟元年辛

酉鄉試第三人分考江陰李忠毅公應昇奇其文拔冠一經久
在公車時望益隆巡按劉呈瑞提學魏浣初疏舉境內人才皆
第一崇禎十三年庚辰授浙江德清知縣時中原盜熾州郡陸
沈捧檄者蹙踣懷兩端公謂拊循東南所以戡定西北天下事
尙可爲也忼慨誓行初蘇浙仍歲奇荒繼以早蝗民飢無食公
到官綢繆振賙存活數萬家明年夏浙西三府大水湖州尤劇
公百方拯濟顛大府蠲緩以貸災黎不省七月浙撫劾德清崇
德兩縣誤漕是時政府方尙按括遽稟旨逮治緹騎洶洶崇德
令趙夔自縊公奮曰朝廷付令此土蒞此民義當與民存亡今
百姓糜爛至此而寬政不逮朝廷容曰不知謂守土何吾寧歸
死司敗救此一方民遂就詔獄獄中極陳地方荒苦疏曰微臣

聞之水旱者極備之凶也補救者時亮之權也去不忘憂者職思之勤也死不忘忠者事君之節也竊惟天災流行何處蔑有未有四五年來饑饉洊臻旱歿鬪虐子遺靡定降割繼行井邑爲墟民物將盡如浙西之甚者也追惟九年十年浙右奇荒亘古罕有桑株砍伐耕牛宰償至迺掘草鬻土人類相食小民死徙之餘未獲安業而十二年夏秋之蝗旱冬月之霖雨又作矣陰淫積久淋漓非時去年夏五甫交龍水驟發百川灌河鳴山應谷江浙蘇松常嘉湖數郡稽天鉅浸千里瀰漫吳江德清腰腹太湖如坐釜底茗雪諸水與江海翻波於斯時也城隅傾圮隄堰潰決解署泛汪洋之漫壇廟無暎乾之所起視四境穀蔬淪沒室廬漂蕩人畜蔽江流而下帆檣緣木杪而渡男號婦哭

天日爲昏其有乘高駕浮卒不卽斃者無所得入以驚棚飢羸有孩稚推棄於漲中夫妻子母枕藉待死於水涯自矣微臣此時受任未久四出拊循測量潦勢深者水可數尋淺者猶至滅頂坊廂如此鄉堡可知是以塘橋以西尖山以北千村萬落煙火斷絕傷亡死徙民氣索然詢之故老僉云江浙水荒創於萬曆丙午慘於天啟甲子然前此兩見皆淹未兼旬茲則崩騰數月前此民戶蓋藏尙足枝吾且夕茲則凶飢之後元氣蕭條歷數三十年來上天降殃虔劉下國未有甚於此時者也微臣目擊情形痛心酸鼻自傷爲人司牧政刑頗僻措置乖違無以導迎祥和覆以招災速戾使萬戶生靈顛連若此是時卽肆微臣於市朝正溺職之誅謝橫死之眾是微臣所大願也當已再四思

惟圖拯救於萬一顧遭納隍有願起瘠無因不避先發之嫌而
官庫如洗矣欲倡富民之義而大家中落矣期需抽分之益而
商船裹足矣思乞隣封之糴而同病無門矣四顧旁皇搥胸飲
血不得已兩申撫按面要道府籲懇丁糧漕白一切奏蠲發帑
截運以資接濟是時非無尼微臣忱微臣者微臣以謂熙朝聖
聖相承勤求民莫深仁厚澤二百餘年矣高皇帝設預備倉禦
荒歉地方偏災州縣不以聞者許耆民申訴處極刑永樂中河
南飢文皇治有司之玩泄者榜示天下宣宗皇帝聖諭民飢無
食濟之當如救焚拯溺何待勘爲煌煌大訓我朝鼎命之隆在
此也至謂籌饗方殷浩費恐非朝廷意是又淺之乎測皇上矣
皇上御極以來以祖宗之心爲心以天下之安爲安迺者不因

早齋居避正殿乎不振延緩飢乎不餽南陽粟乎不普免山西
新舊二饗乎微臣方且恃天恩之有素盼大吏之飛章方且喚
咻老幼撫摩瘡痍勉之以忍死須臾慰之以大澤將至而不謂
漕兌嚴期突然逼迫矣揭參符劾急如星火矣微臣奉職無狀
法重命輕欽奉嚴提之下分宜速正刑誅引義自決而必覲顏
囚首歸死司敗者非有所顧望也伏念唐石烈士馬前一騶耳
尚思排豐碑撞守卒俾自致於萬乘之前以鳴主將之勞烈方
今聖明在上居高聽卑坐使一方嚮隅恩不下究九重萬里壅
於上聞萬物樵賴而陽澤不施羣方戴盆而天光不照汝身雖
殲汝罪不容誅矣且夫蘇浙數郡錢漕金花銀之偏重天下所
知也里下辦差如解戶糧長馬船頭館夫祇候擡柴脩倉接遞

站鋪牖淺夫諸色目又如寄養馬匹黃穰苗撞竿等差徭又有採買銀硃生漆鐵線香蠟金兩取求之無藝幫貼之煩猥天下所無也荒旱以來帶征有三年五年添派有助饑練饑又天下所苦也萬一賜賙無聞追胥如故虎冠之吏敲吸爲能藐爾殘黎展轉之下惟有逃亡逃亡不能因而鋌險時事將有不忍言者宋臣曾鞏之言曰振災不力小民或出無聊之計有窺府庫盜一囊之粟一束之帛彼知己負有司之禁則必鳥散鼠竄竊弄鉏耜於草茅之中以扞游徼之吏疆者旣囂而動弱者必隨而聚矣不卒或連一二城之地有枹鼓之警國家胡能晏然而已乎比者中原多故風聲播流保無有梟獍之徒包藏禍心乘閒思亂初猶煽劫繼且盜兵裹誘漸繁橫流益潰陝晉楚豫其

已事矣是可不爲之寒心哉語曰失之東隅收之桑榆又曰前車覆後車戒前車覆而不戒是後車又將覆也是故欲回天意先召人心欲保東南財賦之疆先予億兆更生之路伏願皇上獨斷聖衷截畱南漕米十萬石准在淮南水次駁放仍提浙江存畱銀十萬兩火速散施其科辦帶徵添派各官錢暫從恩免或仿宋范仲淹守臨安興工代振故事令飢民挑濬吳淞白茅兩江赴役就食若此則收行水之利廣澤枯之仁會列祖眷顧之靈弭五行飢穰之患塞姦人窺窬之竇鞏皇圖保定之基胥於此乎得之孰與屯一時之膏釀滔天之禍而後悔無及哉若此則微臣去職爲不徒忠言爲有補則雖膺大戮伏斧礮且將含笑入地矣奏入帝驚歎動容踰月普免直省存畱起解上供

本折錢價百姓驢嘯謂公有回天之力謹按三朝野紀云十五年正月元旦諭各省十年以前一應存留起解上供本折錢價盡行蠲免又以江浙荒旱許各府州縣以來抵漕百姓驢嘯稱慶又云德清奏入不踰月遂有元旦豁免恩命德清漕兌旋亦報足獄遂解謫南直蓋此奏有以上感帝心松江府照磨起臨淮縣知縣聞內艱未赴累擢刑部廣西司主事兼兵部武選司事轉戶部郎中當是時帝知公忠實有意嚮用故驟遷其官會憂歸而止無何南北都相繼淪陷公忿不欲生丙戌繼丁憂福州亦亡陳文忠迺與總督丁魁楚巡撫瞿式耜等援立桂王子永明王監國肇慶故輔蘇觀生懷貳別立唐王聿鏘於廣州永明王既監國起文忠督廣東福建江西湖廣軍務並勅公團練水陸義師勅曰破斧之章首為輔臣誦之次即及於爾矣欽哉會

大清兵

入廣州聿鏘執死明年春張文烈公家玉陳忠愍公邦彥及新會王興潮陽賴其肖先後起兵公亦以六月墨線舉義盡毀其家輸軍實與文忠募旅於九江舟師千餘艘多蜚戶番鬼驍勇善戰亟約忠愍共攻廣州撫花山盜三千人偽降得守東門結衛指揮楊可觀楊景熿為內應舟師剽銳甚一戰奪西郭礮臺焚敵樓殲突將城中大震嚴詰反側可觀景熿事洩死三千人皆坑殺兵遂劬

大清兵

方破文烈於新安聞報遽反忠愍相與謀邀而火之於禺珠洲側礮亂復敗忠愍奔三水公與文忠卻還九江故御史麥而炫破高明來迎迺入講縣事以待西師九月

大清兵逼高明為十覆迭攻之公激勸忠義晝夜登陴拒守五十日

而城陷文忠被執公從容西嚮再拜齧指血題絕命詞遂握刀帶雙鞬馳下旨敵而死年四十六官生區懷炅舉人區銑以下從而死者二千人城中男婦皆喋血逆命無一生降者難後其

城遂空實丁亥十月二十九日也

謹按楚庭稗珠錄十月廿九日李成棟破高明執陳文忠

及邑官生區懷炅生員區宇寧曾一唯回省殺之攝縣事南海鄉官朱實蓮力戰死邑舉人區銑貢生楊從堯譚熙昌程憲京致仕譚應龍生員楊如桂關倫紀譚建新楊從先譚夢蘭譚介維嚴必登譚登魁譚有珍譚象璠曾啟佐劉民欽李宏才譚象與劉景星楊而楠譚燧譚繼俊楊際昌程憲雍楊應遜李鍾岳楊本立譚可美劉守芳譚雄養麥萬垓莫可當等及男婦二千

人俱巷戰死先是麥而炫譚相國率眾往新興至十二月而炫

同弟而焜及嚴曾謝達等在東安被執回省亦死於是高明城內遂空迄今百餘年尚荒涼也又按南海舊志時同事死者黃炅元兄弟皆邑庠名士

贈公光祿寺少卿廕一子入監御史饒元璜言諸忠臣賞薄晉贈嘉議大夫兵部左侍郎三代同官諭賜祭葬再廕子國子監助教錦衣衛正千戶恩卹有加焉公既毀家子國薦國藹幼弱

邏騎跡之急同里處士陳南叟冒死匿之複壁中數年禁解獲全處士公僚壻故與公同娶於高明區侍郎大倫者也

謹按處士所居日高樓坊匿遺孤處古蹟尚存公幼有大志雖長華膺被服必於儒者工詩文重氣誼士類歸之至性天植事君不辟難馭眾無匿誠其發也

如鬱燄怒雷屈而必達常日誦蘇軾之言曰吾曹既效命於世有可以尊王庇民者則忘身為之其它禍福之來有不自我者

不足較也著有積雪軒集冬春草橫雲軒集春江詠西樵草鈞行於時惟冬春草詔獄時作陳文忠謂其忠孝之理一篇之中

三致意焉其言最善入人云

大清乾隆四十一年丙申褒錄勝朝殉節諸臣

賜諡烈愍子祀忠義祠

據明史列傳

欽定古今圖書集成氏

御批通鑑輯覽唐桂二王本末三朝野紀四朝成仁錄南
疆繹史楚庭釋珠錄粵東詩海陳文忠公手簡吳鍾繼冬春草
序廣東郝通志阮通志廣州府志南海縣
志高明縣志九江鄉志沛國世紀參脩

謹按明史及諸志書謂公原官主事

欽定古今圖書集成公本傳云陞刑部

主事轉戶部郎中履歷甚明足昭傳信故

殉節錄詩海小傳皆從之今亦據為定論

又按明史謂陳文忠以丁亥八月起兵於

九江村省邑諸志並同鈞似未覈陳巖野

集後陳公本傳言七月公將攻廣州先使

衛指揮楊可觀楊景燧為內應而說花山

盜三千人偽降得守東門於是與文忠會

師九江約文忠從徑道攻廣州西南而公

從海道攻東北且邀李成棟歸路期以七

月七日薄城城中人三鼓皆發約既定公

引舟而東而文忠以五日薄城一鼓奪西

郭礮臺火器焱發焚一角樓敵大懼嚴捕

細作而內應謀洩可觀景燧並被執死又

犒花山三千人於院分伍而入即斬之

據此則起兵非八月可知惟南疆繹史永

明王紀畧稱大清順治四年丁亥六

月庚午朔明大學士陳子壯起兵九江鎮

與張家玉等破東莞高明諸縣秋七月甲辰進圍廣州不克月日與陳公傳合當得其實據明史陳邦彥傳七月與陳子壯密約復攻廣州子壯先至謀洩云云卻不誤足以相證又九江鄉志稱丁亥六月閣部陳子壯在鄉奉勅起義聯絡義兵千艘朱實蓮奉勅圍練水陸義師七月義師兩攻省城不克恢復三水清遠高明詮載亦確今從之明史公字子潔圖書集成作絜按漢唐石經宋九經潔已以進俱作絜字又按劫灰錄謂李成棟入高明公與陳文忠俱被執同日死廣州市與史志世紀戰死之說異此書奉禁記載多譌今不從

九世松濤公

從父舅弟子亭公附

公諱會蓮字子茂號松濤箕作公二子也蚤補邑弟子員績學工詩尤以才譎辨治顯初崇禎十七年詔天下被陷州郡員缺悉聽撫按官辟選更置不拘科目生員而其時以知兵保舉韜畧著稱者率假監紀推官董戎事歷行閒永明王正位號公膺薦辟驟授監紀推官難後山澤佯狂以遺民老爲詩秀朗閑逸絕去詭譎頗近大復山人格調鄉正覺寺歲建上元道場同時佚老野服游敖陳給諫子升曾文學君棐鄭文學箕黎州守春曦從兄協蓮等咸有詩金春玉應號稱極盛公吟成羣謂壓倒元白也從父舅弟現蓮字子亭則明公次子溫惠有文見者期遠到年三十三遽卒妻歐陽氏節行自有傳據明史選舉志九江鄉志世紀淨煥

公伯蓮子亭
公墓誌參脩

九世飛泉公

弟華千公長齡公從祖舅弟懋庵公附

公諱叔蓮字子度號飛泉懷玉公長子也隨陳文忠舉義以武節顯名歷官游擊漸漬家學親風雅善書畫有儒將風其寫生設色多傳於時公弟振蓮期蓮振蓮字子啟號華千與物恂恂無遽言厲色期蓮字子愛號長齡補諸生繇三水籍篤行有聞國變並隱居不仕初與公同膺武選者有從祖舅弟世禎字子瑞號懋庵九萬公子繇武生應海道辟選委管營哨兵務有能名據世紀脩

謹按長齡公名世紀作期蓮康熙丙申舊

譜作暮蓮按公祖夔州公墓碑作期蓮則

作暮蓮非是今以石刻為定

九世騰一公

公諱龍齡字飛卿號騰一正齋公子也幼失怙母張氏苦節自有傳公既孤露耽玩墳典以辭翰知名於時兼通曲藝慕戀偏親不言祿仕里居教授五十餘年節母以遐壽終門下士多科

貢發名者

據世紀脩

九世海若公

公諱光祖字象之號海若太一公子也丰儀冠玉器幹周通繇邑學中萬歷四十年壬子舉人選授廣西融縣知縣融猺獠襍居頑獷些窳公愍其陋手教開示躬臨化誨昏喪服器各有條式儉俗漸革深箐邃谷游有都邑之風毗庶知感益以愛養為

事豪猾侵漁者竄伏縣人甚德之巡撫王公尊德表上治狀為嶺西列屬最傾心薦達崇禎三年庚午分考進陳天明等連掇上第號得人時有亡命韋付能以梟悍擅西甌流寓融境與猺藍大口相讎殺假南丹州狼兵二千屯郭外走使邀取印檄與藍鬪士民股慄代請公堅不許嚴為備謂邑眾曰吾氣亟吞賊敵鈞猶制勝况名義足讐之乎諭令解散賊果宵遁公之久在融也行擢授矣屬有巡檢誣訐事聞人巡檢徐行悌克狡人也介恃其子居兵備幕挾公謀攝王簿公誑之借荒後缺糧額中傷下府覈視事白奉兩臺提責悌計窮百方構陷會遷南直揚州府通判迺乞養歸年六十二卒先是正德中里人曾俊嘉靖中博羅翟宗魯迭宰融縣有聲語曰融令清白前曾後翟公繼

鄉先達後名與頡頏邑人以爲美

詳據九江鄉志世紀參脩

九世松蘿公

公諱光允字嗣之號松蘿湛一公長子也脩述儒學動止有儀偉然負清望充邑廩生試輒冠軍萬曆二十八年庚子鄉試取雋魁書本房仍失解又五試中四十三年乙卯舉人七上公車歸則選文授徒亟爲諸生講經世之學一時名雋馮工部毓舜關戶部家炳黃給諫葵日等皆出其門初選龍川教諭出俸築尊經閣立鼇湖社課多士策禦流寇督毀淫祠尤振丰采內遷國子監助教轉監丞擢戶部陝西司主事謹按關王政家炳湛源公墓誌稱公官戶部員外郎監督寶泉局事奉命協理錢法三載釐剔奸弊歲增息數萬前政積逋完墊具足公私賴之時郡國軍興度支大絀廷臣

爭杼計畫戶部尙書畢自嚴擇上十二事曰增鹽引議鼓鑄括
雜稅覈隱田稅寺產核牙行停脩倉廩止葺公署南馬協濟崇
文鋪稅京運撥兌板木折價已復列上十二事曰增關稅捐公
費鬻生祠酌市稅汰冗役核虛冒加抵贖班軍折銀吏胥納班
河濱灘蕩京東水田殿工冠帶帝皆允行然揆索璫碎弊混叢
興於灌輸仍鮮益也其天下田賦萬厯末合九邊饟止二百八
十萬至崇禎初加派遼饟至九百萬勦饟三百三十萬業已停
罷旋加練饟七百三十餘萬歲約加舊賦二千萬有奇海內人
不聊生益窮愁思亂公蒿目時艱劑量斟酌作戶部籌饟政議
論者謂其言無夸飾切實可行崇禎十年五月竟以勞悴卒於
官年五十八管尙書事戶部右侍郎吳公國仕疏請卹典事蹟

紀錄付史館公清標絕俗久任羶曹一塵不浣京邸費恆給於
家不繼則妻父陳縣尹超然佐之旣卒同鄉黃內閣士俊梁翰
林兆陽葉都諫廷祚郭都諫尙賓入視含殮簡遺囊餘官俸八
緡而已皆嗟歎泣下羣飲助歸其喪在官畱意桑梓粵中利病
銳意興革蠲穀稅清厰蠹兩條陳尤孚輿論生員左逢世沈寃
犴狴十餘年力爲昭雪省釋其懣切嗜義多類此故於其卒也
鄉人怛痛慕思之

據明史食貨志九江鄉志風操
堂集世紀從孫烈本墓誌參脩

九世開雲公

公諱光衡字開之號開雲湛一公次子也資穎百常童十歲作
聞雷詩十二隨父任咸寧作送王父還鄉詩皆雋邁殊絕於人
稍長淹貫百家諸史詩古文辭旁及書翰俱工與母兄戶部松

蘿公從兄通守海若公自相師友兩兄交讓之弱冠以禮補邑廩生數困場屋遂放情詩酒聲伎以自娛仗義忼慨赴人急難揮金如土與伯氏分產準折昔所嘗費兄弟交讓久之善爲詩飄逸幽折得謫仙風韻有貴介欲奪所眷女侍書公一夕代賦青樓怨五千言鐫刻成帙雖古子夜桃葉辭無以過旦日示貴介貴介驚服踵門謝盡驩而去天啟六年卒年三十八著有客話游息齋草獨游草象谷戲草恨草行於世

據南海縣志九江鄉志闕名木墓誌

脩參

九世英巨公

兄楚穀公附

公諱環字乾中號英巨惺字公次子也奇慧讀書過目不忘年十一賦落花詩出語驚其長老既束髮嚮學與兄璧齊名璧字

乾章號楚穀豈弟孝友爲邑名諸生少偕里人黃副使應秀游庠同研削者十餘載稱刎頸交公學鎔鑄經史好講求天下形勢阨塞嘗夢古衣冠老人授以武經自是遂於韜鈴著有兵畧管窺三卷自謂得孫吳之祕然矜惜不輕示人屢試不售遂寄興柔翰日與諸名士逞來於西樵白雲間興至輒引大白賦詩爲樂性豪喜俠而持己甚介親識亟高其行惺字公耽吟詠公視於無形居恆與兄迭唱咸得其驩心編詩曰朱氏堽篋集卽公兄弟唱和娛親之什也伯氏詩力追中唐冲澹有自得之致公詩孤潔峭厲不蹈前人蹊逕亦足獨步一時畫法二米有偈

眞者時人競藏其手蹟天啟七年赴試廣州舟覆卒年勵三十

七士論傷之

謹按九江鄉志天啟七年三月十九日生儒應試問渡沙頭過奇槎舟覆溺死百餘人本鄉居半

方公之未歿也宗族交游羨其才博靡弗以時俗所貴者期之而公亦未嘗自言所志於人迨閣部陳文忠公子壯舉義亟謂家戶部微龕公曰君族兄英巨志士也才可用曩令伊人宛在則吾屬此舉克分帷幄憂矣公歿垂二十年猶爲名流眷憶若此初東陽張忠敏公國維令番禺聞其於郡城西反過客遺金爲之傾慕馳書聘就師席公謝不遑張公嗟歎手書高風偉節四字以贈云公所著兵畧壘篋集外有周易闡微史要拙齋雜錄守拙山人全集

據黃應秀惺字公墓誌彭貞本傳從子國材本墓誌參修

九世雲漪公雲庵公

雲漪公諱宴字乾泰涵宇公長子雲庵公諱璿衡字乾齊海玉公三子雲漪雲庵其自號皆粵軒公孫也雲漪生而彊記日誦

數千言不遺一字時士人治禮經者希涵宇公起家尙書以公之敏也授以戴記公覃精探賾豁然貫通一時言禮者皆歸焉甫冠爲邑令劉公廷元賞拔進補郡庠生學有廉隅尤喜實事求是期衍世廣場坐對風貌樸澁溫溫寡言見者以爲鄉老或不與拱揖及質以疑義則縱橫博辯口如懸河聞者心折郡邑貴游延講戴記無虛日子國臣國材開浩社於鎮海樓同社數十人咸仰公爲山斗樂師宗之注禮記四十九篇傳於家雲庵爲公從弟亦蚤補弟子員爲一郡冠才名藉藉卒困諸生無稍愠家席素封餐脫粟衣褐衣蕭然若貧士其與人交和光可飲也酒後耳熱童奚稚子可與言驩至雜以非義則項發赤髮上指雖親昵無所貸族孫宗元誌墓以謂公晶中朗外步架趣

繩敦彝選交守和握固大都治經顓慤不如雲漪操行弗讓也
雲漪順治八年卒年六十三雲庵康熙二十八年卒年七十九
據阮解雲漪公墓誌族
孫宗元雲庵公墓誌脩

十世東湖公

公諱如川字叔元號東湖都矯公次子也嗜學以博洽稱事親
色養備至體羸善病親禁不令讀迺夜翳燭閣誦勿使知久
之病日臻有告以岐黃術者瞿然曰身體髮膚受之父母不敢
毀傷孝之始也吾縱不能立身揚名忍以毀傷憂二人虐且為
人子何可不知醫於是移其治學者治醫不半歲病霍然瘳而
世之求診者日滿戶外遂誼然以國醫稱矣公繇是壹意以葆
真樂志為事不復繫情榮進脩竹之陰風月之夕徜徉甚適由

由然童冠可偕而寵辱可忘也以醫隱終同郡尹太常源進謂
公蓋有道者非直一世士也尹公四世通家子最知公
據尹源
進本墓

誌脩

十世遠公公

公諱厓舊曰如璫字遠公荆門公長子也淹通誕放介居夷惠
之閒自以名家孫世變不仕出與處士番禺屈大均華夫東莞
張穆鐵橋順德薛始亨剛生始亨弟起蛟牟山及北田五子何
絳不偕何衡石頑陶窳苦子梁槌器圃陳恭尹元孝等游諸公
皆斂衽下之元孝終為撰傳傳曰朱山人厓南海人生弱甚而
有氣操於交友最篤遭亂棄舉子業挾其技以游無所遇年三
十七而卒嘗夜客帥幕武士四五人相與論刀棒君於月下聽

久之謂曰此法未精密也四五人顧見其文弱皆笑曰秀才何與刀槊閒事邪君請與試對執丈二棒於一隅立武士一人前盡其擊刺之術君植立不動既其所攻而徐應之意態甚閑而攻者終不得所欲君俟其迴旋急進足深剿之中其股而仆君笑謂四五人曰皆來四五人者忿執刀仗四面至君進退左右不越尋丈而棒之所及四五人無不失仗噉伏者君嘗爲余論曰丈二棒而操其中前後餘各五六尺手動寸則末尺動尺則末丈而戰者常側身所備者縱七尺廣七寸耳故手上下左右不使過六七寸則力專而握固以拒則堅以擊則破昧者用力費而神搖是以敗蓋吾師云然亦兵法也善白描人物得古意矜惜不輕予人尤不肯爲時貴人作垂歿之年益精而世希得

之詩存者若干首元孝文出天下皆罕然想公丰采矣據南海縣志獨

澆堂文集
世紀參脩

十世嘯峯公

從父中洲公子景斯公附

公諱元英原名培泓字澄脩號嘯峯鹿亭公長子也以詩補新興學廩生康熙五十一年壬辰歲貢讀書耽道友教州里號稱儒林丈人能詩善書兼精六法當世推爲三絕其詩清圓靚麗風調不凡每遇疊韻尤以葶甲新意見長書到吳興熟境繪事煙雲杳靄氣韻蕭疏最得文董家法公亦太邱道廣逢人乞與四方投贄趣庭者縑素塞屋有鐵門限之稱金石碑版揮灑日富里人陳博民勸築桑園圍於明初功在枌梓同時新會黎貞爲作祠堂記而墓碣迄三百年未立後人特乞銘於關太史上

進而乞書於公時謂皆國士選莫年造詣益復精進門人陳忠爲畫讚曰先生紫陽裔一時稱賢豪小子少操觚曾仰門牆高追惟公壯年雲霄一羽毛今年七十六幽居且陶陶接見屏山麓白首任重搔磊落縱行吟竟日不辭勞余爲寫其真癯形宜道袍丰神一似昨曠懷隨所遭廊廟失此人邱壑任吾曹辭賦共收拾畱以續風騷屏山者瀧東玉屏山公講學於是與關太史各爲詩所謂蕙園唱和者也年八十三卒著有鏤雲齋集初吾家世業風雅其書畫之學則白岳公崛起名世而攢雲公羽翼之衍於中洲公飛泉公淨煥公達遠公公暨公父子稱一時之盛白岳公等皆別見中洲公諱端御字自李別號中洲居士文屏公次子西寧諸生改南海庠兩科武舉夢偉父也公長子

長祺字景斯亦篤厚能畫

據木蘭軒集陳忠本畫贊世紀採訪冊參脩

十世受子公吉子公

受子公諱國薦吉子公諱國藹受子吉子其字吉子別號峩山皆微龕公子也以微龕公難廕受子入國子監尋以御史饒元璜言加廕國子監助教吉子亦廕錦衣衛正千戶有旨令及歲得朝見授官當家難時兄弟皆幼弱怙危甚爲從母夫陳南叟所匿勵迺獲全語具微龕公傳旣而冒死迎喪反葬於王父夔州公兆蓼莪之痛逞復悽切鬱鬱辟人而行其後受子隱居奉母不去其鄉吉子逾嶺嶠涉湘漢逖迹蜀中徘徊草澤卒無所就而反同里岑處士徵志節士也贈詩有頻從密坐詢行蹟愁嚮寒鐙問劫灰去住無成俱老大酸辛同過十年來之句二公

竟以齋志歿於家

據選選樓詩集世紀參脩

十世南軒公

族舅弟存心公省我公附

公諱禧龍原名汝棟字居壯號南軒開雲公長子也就傅喜按覽經史大父湛一公聞而樂之挈諸贛州官舍益脩謹有成人風尋補順德學弟子員歷試四十年數奇不遇然恬夷無悶以守素終其身康熙二十三年卒年七十二時族中風氣敦龐人無夸志其尤勵長者行斂退無趨求者曰炖曰汝賢炖字裕君號存心長齡公次子賦性淳直少與劉進士一麟同學文行相先業師劉公士課最器之出試邁三藩之亂迺絕意科名閉門教授晚補廣州儒學贊禮生員汝賢字建立號省我性亦朴直孝悌力田終身居古上沙樹德里君子謂兩公之篤行於其畧

號知之也省我以康熙三十七年卒年八十二存心壽八十其

卒在雍正九年

據關嘉茶南軒公墓誌男元昌省我公墓誌世紀參脩

十世四古公

兄南喬公子東陽公兄子劬齋公附

公諱國材字篤甫號四古雲漪公次子也年十三進郡庠旋授廩餼隨雲漪公館會城提學科歲試大府觀風公輒傾其曹輩拔為冠軍時社事盛興吳越豫章競坳應社復社幾社等標目鐫文著錄帳飲徵歌千里響赴公希風而起亟與兄國臣倡浩社於廣州鎮海樓國臣字世甫號南喬邑諸生蚤歲兄弟齊名社既闢會者數十人皆嶺海英雋一時文采翕習聲華揆張前此未有也鼎革後洊更世難意氣益平踐履益篤所為文益旁魄入古擅絕當時每一義出人士借觀朝傳夕徧康熙十二年

癸丑歲貢十三年甲寅

廷試

旨擢第一名尋授開建訓導教士有恩色厲以溫指畫諄諄可畏而親諸生心戴之年六十七以康熙二十八年卒於官公晚年神思轉澹與道大適嘗揭坐隅曰吾何求哉吾何求哉吾惟天所命而已又曰願天常生好人願人常作好事餘無營焉性通和好宏獎氣類人有一技誇歎不容口其行能傑出者則折輩行下之關檢討上進未第時贊文於公公詫為絕倫出彙付檢討彈射檢討亦歎服謂入鈔入能一字不可增損當是時兩人齒後先相去蓋三十年脩北海平原故事為忘年交論友誼者至今以為美譚及公捐館檢討哭之慟又賦挽歌十五章以謂夫

子在則肝膽若可恃夫子歿則歲月皆無聊生身四十年惟夫子知我也公所著有四古遺稿子燮元兄子耀真皆知名燮元字始升號東陽連州廩生力學不廢治生晚致沃饒耀真字衢升號劬齋國臣子信宜庠生亦經營而進取不輟云

據木蘭軒集世紀阮

解雲漪公墓誌採訪冊參脩

十世樂餘公藍隱公

樂餘公諱殿孚字光卿行五藍隱公諱殿獻字賢卿行六皆龍巖公子也厥兄三人各自樹立而二公居其季次相連年相上下而生平志行正復相等為人樂易仁厚於物未嘗迕眄溫溫似不能言及卽之與居瘡久而瘡可愛聞而出其所得瘡出而瘡無窮粹然純明篤實之君子也遭時不偶不屑突梯勢利以

爲理亂不知黜陟不聞者天下之完人也故甘心鶉居伏處長
逝不顧平居樸陋自喜治家稍贏輒以餼親舊人皆德之暇則
頽清流坐茂樹兄弟肩隨偕故人流連譚讌盤桓竟日其言簡
而有意飲酒終日不亂從之游者挹其貌而悚聽其論而驚以
服久與居而不能舍以去也春秋旣邁長號曰樂餘言隱者之
樂足於中而無待於外也次日藍隱又卽其所居藍田爲名皆
志實也古有兄弟偕隱者於二公見之矣樂餘以康熙五十年
卒年七十一藍隱少樂餘二歲年六十一先樂餘歿在康熙四
十二年初二公志行旣同樂餘娶余藍隱娶關又皆有婦道琴
瑟之雅築里之驩兩無閒言故弟兄相屬預卜歸藏於新會雲
村寶鼎山歿而同兆焉右皆族子宗元誌文云然時人以爲

信

據族子宗元
本墓誌脩

十世伊石公

弟瑗公公附

公諱昌瑤字佩公號伊石一六公三子也肫悷肯任負遵承曾
王父性庵公大父太赤公緒業學有內心而公於撰述更欲言
提其要屏居家術綢繆享嘗增脩譜牒於敬宗收族尤有功其
脩家牒也謂七世以前壹沿龜臺公萬曆丁丑本百四十年矣
顛觀房世系則得之族孫北渚所貽亦兩紀有奇矣其存著釋
思兩房固莫之有紀焉迺勵志詢訪或獲自一方所存也或得
之半簡所遺也其闕而未錄者猶七八也又數月不違至於再
至於三不憚奔走然後彙至者始全焉蓋按輯顛末肇端於康
熙十九年庚申旣成於康熙五十五年丙申首尾三十七年而

公年亦七十有三矣其勤也如是故吾宗無幼長小大誦詠之
至今第昌京字瑗公行六更名光圻少穎慧文譽赫然未娶邑
試冠軍將屈府考遽卒文宗閱其文惋歎彌日

據康熙丙申
譜世紀參脩

十一世念倫公

族祖敬波公附

公諱庠序字元學號念倫石塘公長子也忠厚子諒素有隱德
自曾大父念睦公移家鄉東北墻曰石塘口介居外戶公設誠
與物間右化之年至百歲迺卒方公九十宗人悅喜為設介眉
之祝禮侑於先廟之孔安堂合樂行廚供帳甚盛公雖大耄神
明不衰醕酢降升咸中儀軌雍容怡愉式燕且譽禮成宗鄙驩
嗥人人得其意以去吾族介九十壽觴自公始也上沙朱氏號
多老壽而克臻期頤者粵林公後有敬波公暨公而三敬波諱

守柄字鳴甫公大父行也亦以淳行享大年邑志闕錄

據南海
縣志世

紀康熙丙申譜男王
蕃敬波公墓誌參脩

十一世相輝公

子嘉瑞公超瑞公附

公諱昌國原名謙字懷六號相輝東湖公子也起家韎韜然讀
書知大義士大夫多折節與交康熙十五年起從軍隸平藩戲
下討禽反側數有功授把總進水師千總歷水師中軍守備海
陵大捷擢援勦營都司遷撫標右營游擊歷官有折衝汗馬功
而周旋縉紳間未嘗以麤材見薄云子六龍徵龍標尤著龍徵
字嘉瑞國學生州同銜性量汪夷有包荒之度龍標字超瑞恬
於榮進年八十杜門教授如壯時

據世紀康熙丙申譜闕
名都矯公墓誌參脩

謹按康熙丙申舊譜龍標字超瑞世紀則

作起瑞起瑞是公從叔名未必冒用作字
應從舊譜

十一世逸洲公

兄天然公弟覲尊公附

公諱學進字結尊號逸洲存心公次子也康熙五十四年游瓊南反督學鄭公晃取入雷州庠雍正七年督學顧公仔改復廣州原籍鄉闈十上垂老不休而無尤物骯髒之色胷無柴棘時人服其有容生平不信釋道亦不加詆謔嘗曰彼亦自爲一教吾儒置之度外可也乾隆十二年卒年六十七將終祇以不及待母爲憾語不及家兄榮高字爵尊號天然和厚鮮迕弟騰高能文蚤世人尤惜之

據世紀脩

十一世厚齋公

公諱宗元字輿嗣號厚齋耀昆公次子也學成紈綺文學焯然童年補邑庠連試高等充廩膳生同里鄧明經雄宿儒也讀其文選字以女巡撫關東石公文晟至粵愛士有聲觀風十一郡二州生儒拔公第一以其卷傳示諸生以爲真三洗五伐之候時公裁及冠未昏也旋應康熙四十四年乙酉鄉試中式屢上公車選授崖州學正弗卑荒陋號能任官竟以土劣感疾卒年勵四十四公承大父魯庵公考耀昆公家學最留意程試經義故蚤負時名掇科後兼習古文辭感物造端不區區前人格轍而真氣流行清雄絕世一時文士皆以健者推之

據世紀康熙乙酉本鄉試

卷觀風
卷參脩

謹按世紀祖祠恩光錄厚齋公任崖州學

正卒於官廣東阮通志作官教諭誤

十二世北渚公

弟接希公附

公諱順昌字宏矩一字叔劉晚號北渚陽谷公長子也穎異有雋才蚤游孝廉關嘉薦思齋門關先生許爲都講康熙二十三年以詩補恩平庠生明年充乙丑拔貢肄業成均祭酒常熟翁公叔元器重之四十八年選授清遠教諭五十年丁內艱歸五
十三年

覃恩封贈起補文昌教諭五十四年奉

旨赴京考試引

見暢春苑六十一年再荷

覃恩雍正七年俸滿遷高州教授自以年屆七旬引古大夫七十縣

車例致仕歸公爲人眉宇清揚願身玉立然豐下不戍削宛有容觀器幹開敏志在救民立事旣束儒官無所試儻儻教士暇猶欲於所甚利害者埃閒贊行之累官在文昌最久文昌令遼陽馬日炳健吏也勤於厥職公與爲寅僚且十年稱契洽文有繕撰事有仍革令每咨而後行邑棗闕畧令屬公脩纂發凡起例雍繁補空不從撓阻遂勒成文獻專書歷乾嘉至今百四十年猶行公本邑蔚文書院有濟貧濟荒辦祭科舉田皆勸捐義舉日久弊生積多侵冒公偕令奉文追覈一一清釐縣城舊建東門與南北門品列而三明季壘閩民氣曠鬱公贊馬上狀於府及時捐闢公仍爲撰記榜曰文明人皆稱便報遷高州遽解組或曰高涼美缺何老詩不念子孫公太息曰好官能歷盡

邪吾年已及，遑恤其它。歸休數載，年七十。卒於家。生平耽著述，嫻吟詠，兼以翰墨自娛。爲詩於豐綺縟麗中，別具性靈不專塗澤。在文昌時，儼入景詩傳，誦瓊南非其至也。書善行草，求手蹟者絡繹闐門。雖休居，染翰無虛日。廣交汎愛，所與游多一時名宿。於同里關孝廉龍關中翰、鳳喈尤莫逆。中翰墳草已宿，猶惓惓序其詩以行。方外友則成鷺跡，刪最密跡，刪嘗謂公其行。皜皜其言，諤諤一坐。春風如朱光庭之涓，愨神仙風致如朱希真之磊落。好學洽聞，如朱萬卷之淹博。窮理盡性，如朱考亭之道學。聞者不以爲阿也。所著文昌縣志十卷，外有顛觀房世系全圖、古循閒嚙江邨雜詠、清署吟、北行草、南游紀行、海外集各一卷。季弟順恭字同矩，號接希，注籍禮部儒士，兼精計然之術。

殖家富饒，莫年寄情絲竹歌曲，有隱者風。比歿，與公同墓。

據廣東通志

文昌縣志桐齋集世紀康熙丙申譜何如澐本墓誌參脩

十二世江峯公

公諱元叔，字乾滋，號江峯。耿庵公七子也。幼孤，無藉。孝友，蹶興業。富行能，性成貞。惠蒙學三載，與人爲傭。旋而負販，旋而貨殖。歷數年，坐賈於邨墟，贏餘稍積。窮乏多賴之，然終以儒術未脩。壯志未酬，爲歉爰物色傭保，中得順德陳生，亟加誘誨。復脩執贄禮，受業於鄉。宿學會登五茂才。雍正七年入粟爲國子生。十年捐輸授主簿，職銜。歷應十三年乙卯，乾隆元年丙辰，兩科鄉試。雖不售，鄉人屬耳目。論者謂漢公孫宏承宮等俱起徒隸傭伍，卒能脩儒學，監功名。公之志事，非不占人如也。其成就蓋有

卒不卒焉丙辰孝廉吉兆公族子行也性介寡諧許獨謂公行事翕然滿人意堂上之生事葬祭不以物儉也同氣之友于不以財乖也羣從甥壻之或士或賈不憚曲爲謀也且俠情高誼凡夫家之秀鄉之望國之賢初非有意求援而常喜爲容接故諸朝紳名士心目中無不時有江峯翁其人者又餘事迺勵及書畫之癖而絕遠於求田問舍者之所爲可謂義心清尚矣乾隆十一年卒年五十七

據關上謀本墓誌族子吉兆祭文曾孫深遠族祖迪之司馬先曾祖祭文書後

參脩

謹按關司馬本墓誌謂公爲耿庵公第七子世紀則謂爲第四子康熙丙申舊譜亦祇有培叔國叔名叔元叔四人今考耿庵

公墓碑國叔之下名叔之上增一陽叔意諸子中有蚤殤者譜與世紀不列耳誌表出其家求請定有狀畧未必誤也

十二世木齋公

公諱道南字接東號木齋鏡湖公次子也小名佐興鏡湖公諱世昌字元匯學行交飭嘗籌祠產厚族人公弱不好弄士流以方謹見稱補邑庠生舉乾隆二十一年丙子鄉試一上公車輒戀戀養親不復出授徒於鄉以經義造就胡廣文珽等出其門終身名有師法移館新寧猶之其鄉也十年之間郡邑爭迎主講三十一年

上命王大臣以身言差天下舉人之久次吏部者一等試知縣二等

試學正教諭訓導著爲令曰大挑更數年一舉是時海內殷繁
朝廷至行省皆法令具備知縣但據按行文書而坐擁脂膏不肖
者遂以爲囊橐其賢者不日遷去或十年卽建旄節至大官於
是舉人皆願就大挑得一等不樂在吏部需次教職薄爲儒酸
公獨不應挑以教職爲能用所長三十四年選靈山訓導四十
二年四十五年疊奉

覃恩

封贈父祖里郇以爲榮公旣任學官教士亦本經義守家法猶
之其主講也教官與弟子號有師生誼類多節目闊疏蹤跡曠
隔會講月課率眠爲故事名存實亡公推誠指授諸生日集齋
中無不樂奉規條者邑童子藉公選秀莘莘隨長者後負笈從
游比公六旬諸生儒奉觴製錦闔溢戶外縉紳耆老又相率造

萬民繖葢投獻衙齋皆從前學官所希見時人豔稱之初公之
舉於鄉也令甲沿故明舊制未有詩其後遂變公爲教官綿州
李調元以吏部曹司督粵學嗜稱詩拔獎少年輕斂子弟不喜
儒公持版庭參且報考風貌樸古迂緩其衣冠拜起舒遲不中
趣踰節李弗悅及考詩又不工李迺顏變頰詰責多辭逞復甚
苦公窘甚鞠躬踈階下不得退忽聞李嘆喏曰若舉主何人
顧以科第與風漢邪公抗聲曰梁中堂李矍然止揖公出梁中
堂者會稽梁文定公國治也時爲相公出語人言道南不佞一
生得力師門也其樸誠如此五十三年遷肇慶授未上卒於

靈山年七十

據大雲山房集世紀胡芳
洲本壽序採訪冊參脩

十二世梅軒公

從弟第洪光公族弟第南嶺公族子霞
城公附

公諱春林字太生號梅軒逸洲公次子也夙負文名乾隆十年歲試與同縣林紹唐俱爲邑令萬公紹祖所識拔十一試卒擢公第一萬公謂人林生文如干將莫邪虎氣騰上見者易爲目惛朱君文如大樂希聲妙致縣解非經獨炤之匠恐遂沈埋故不以彼易此也已林洊捷南宮公竟以橫舍老如萬公言著有沛國世紀一卷沛國云者蓋仿唐盧藏用范陽家志之例舉郡望也其敘述按世次前後先臚本支附以族屬議者謂公自四世南塘公七世夔州公以來宦學相承青箱不替其見聞最博故是書質轄而能覈姪直而非誣閒有脫疏未乖確錄足補萬歷丁丑康熙丙申兩譜所未備爲功家乘蓋莫尙焉從彙弟憲昭字洪光更名希夔天然公長子以詩補郡庠生秉雅性嚴於

自律有清名族彙弟先登字康岸號南嶺武臣公長子亦脩文行嘗與族父世昌會文唱酬甚盛世昌子孝廉道南雖雁行以父事之自梅軒公冠軍進學後族子博復以府考冠軍補郡庠博小名發解字赤堂號霞城侶與公長子嘉慶十五年庚午以年例

欽賜副貢生

據世紀族弟道南南嶺公墓誌採訪冊參脩

十三世樵南公

公諱吉兆字迪之號樵南星齋公長子也星齋公諱福原曰官福字萃遠端厚能禮士喜作養幼弱使成材人皆卜爲有後公弱齡有執甘清貧守節概游州里中未嘗以酒食相徵逐金帛相市交朋舊或載酒讌游揮金歌舞輒匿不與蚤補邑庠中乾

隆元年丙辰鄉試年二十一矣久不第需次於家惟以館穀自
 贍暇則合郡中子姓之賢者興築會垣晦翁書院以收族屬房
 眾瞻仰號為宗英二十七年選授河南汝州直隸州清軍糧捕
 水利鹽驛同知州同非劇職公歷官三載廉勤日聞遂膺薦牘
 二十九年邁疾卒於官年四十九公鯁亮負時望受事日淺未
 躋大用時論惜之同年生馮學使成脩謂公如渾金璞玉其存
 心不欺足媿古循良吏云

據公祭族叔乾滋文晦翁書院記馮成脩本畫贊族孫深遠迪之司馬先

曾祖祭文書後世紀參脩

十三世二樂公

公諱大昌原曰可炤字和霄自署二樂居士江峯公子也遐邇
 聞名莊士援例入國學屢戰鄉闈與一時通人名碩聯鑣文序互

相頡頏嘗偕闕同知上謀曾學正文錦等篇章唱和疊韻至百
 不少休諸公讓伏天才堦敏凡酒令鐙謎坐銘楹帖矢口應付
 率皆妙絕時人里人傳誦至今有丈夫子七士商文武各子專
 門咸有所成就故鄉鄙推士大夫有家法者必首公年六十一
 乾隆六十年卒

據關上謀江峯公墓誌關士昂本墓誌採訪冊參脩

十三世龍泉公

公諱炳元字劒書號龍泉永風公次子也充郡增生工舉子業
 名傾一時初乾隆中士林稱舉業祭酒者曰關公銅池梅公哀
 謀關公仁虎鄧公翰西暨公而五並於鄉隣文社著聲月旦出
 五人者迭為弁冕執牛耳盟故里諺有五虎將之目

據四書蠡說序採訪

冊參脩

十三世景園公

公諱福字錫遠號景園樂舒公次子也克脩儒行而行文仗氣愛奇通考並取進南海番禺縣學補南海庠生性夷曠徇羊盛世兼有水泉禽魚之樂以故材術非不可用無舍所為為人意優游漫浪竟以縫掖終嘉慶二年卒年七十八自南川公徙家鄉西偏鬱水上曰盧橘洞河麋鳥鹵號少文學士公翬然秀出英聲振一時族孫孝廉士琦嘗歎曰梁簡文有言濼渙之水可居鄒魯之鄉可貴蓋地以人傳矣

據世紀續族孫士琦本墓誌參脩

十三世江勝公

族彙弟炳齋公附

公諱世貞字興祖號江勝健堂公次子也讀書應舉矣已營業於海南小有遽反為人守信無貳諾裕辦治才凡營葺先廟綜

擊丁糧百廢仰興公私攸賴鄉有叢祠曰儒林廟僦功脩建以公來尸高下百楹並興偕作水衡度支其麗不億公一手征繕人無後言鄉紳馮公城等眠成而已晚益謙謹無故不出戶庭里人舉鄉飲給冠帶嘉慶十八年卒年八十三同時以淳謹稱者有族彙弟務章務章字斐興號炳齋純禮公長子治家嚴飭惟日以守分遂生睦親信友為教故子弟成立者多當其年逾古稀子姓羣請稱祝公辭有待迨嘉慶元年

登極賜民爵級公躬荷

卓恩榮膺冠芾戚族登堂酌兕公迺听然解頤曰田夫野老榮身惟

埃子孫豈意身歷八旬亦自能邀榮於垂老嘉慶六年卒年

八十三弟務賢亦有涪行

據採訪冊族子儒乾炳齋公墓誌參脩

十四世南溟公

公原名爾綱又曰爾鵬字程萬以字行別字南溟二樂公三子也少與鄉人士會文於沙溪來者不距命曰通天社一時文采稱盛而公與高才生關明府士昂陳孝廉履恆最爲魁壘乾隆五十三年受知於督學仁和關槐補邑庠生連授廩餼關在官蒙篋篋惡聲時拔一二人望俊雄以自蓋公見收都人翁服試鄉闈者十有五迭膺房薦卒不售嘉慶十三年考充歲貢生於是公亦有勸志矣公體貌豐碩風度凝然性廉謹靜穆自喜里居授徒不交戶外事講誦已輒掩幃晏坐或反閨婦孺相對而已然鄉隣有急時奮身赴難義氣騰涌無它諉誣也十四年夏海寇張保闖入內河焚畧郡縣大震公偕陳孝廉等倡謀守禦

選驍健鑄鎗礮奔波徹日夜五月丙寅賊大至幫船五百餘披猖甚眾拒敵於鄉南方沙口相持者二日賊卒敗去語具公紀事中是役也制府百公齡謀斷海禁困賊而內地以無備爲所乘新會順德香山番禺南海諸邑沿河邨堡多被蹂躪惟吾九江以綢繆先事屹爲巨防賊挫銳而去事平鄉隣甚德之公教授多在家門士友自遠而至其教士也自舉業經訓外議論好傳以史事證據紛綸馳騁今古尤喜春秋左氏傳每當宵涼無寐秋蟲鳴階必嘖諸生錯坐月露中與譚左傳津津然至漏沈斗轉不之止嘗以謂尙書史之太祖左傳史之太宗古今治天下之理盡於書而古今御天下之變備於左傳明其理達其變讀秦漢以下之史猶入宗廟之中循其昭穆而辨其子姓瞭如

指掌矣至於兵法奇正之節自司馬穰苴孫吳以下不能易也
 當乾嘉之際文體骯髒房行墨義以餽餉為工公獨能根極理
 要其鴻灑鉅麗者或以古文為時文自審與時鑿枘故雖文譽
 蓋世軼出輩流而蚤有退志陳孝廉嘗投公與關明府詩曰勸
 君且勵蘭陵學勸君且揮武城絃賤子無知亦努力人事既盡
 天公憐蓋其時明府方罷縣孝廉鄉試未雋也公輒和曰我聞
 文藝投時好琴瑟不調須改絃此事畢竟付兒輩傲骨不受天
 公憐其介直如此詩才瀟灑能藻暢襟靈古文特工記載其鋪
 敘文直而事覈足備它日史材錄其記己巳平寇一篇畧著梗

概其辭曰嘉慶十四年春前府百公

原注公名百齡姓張氏號菊谿正黃旗漢軍人乾隆

壬辰進士奉

命總師百粵粵中士庶鼓舞驩嘯以復見青天為奉夏四月公入境

父老子弟即以復見青天四字標幟前迓蓋公昔年任廣東巡
 撫拯冤抑黜貪競風采最著尤以安民弭盜為急戟門設鼓凡
 民有疾苦者擊以聞一時官清民樂宵小遁跡外戶不閉會擢
 去縉紳奔走赴當道乞據情代奏予畱去之日市民無聊各負
 米一囊塞官解須臾積米如山不可去公迺夜從解後射圍出
 百姓慕思悲悼衢巷相弔城市為之慘澹無色者累月公既去
 吏治漸弛盜風遂熾海洋賊魁嘯聚益猖獗數闖入沿海郡縣
 焚畧官兵束手甚有與賊鉤通者番禺新造去省城數武耳寇
 蹂躪出沒如入無人之境當是時大吏中豈無有設為憂勞張
 挂告示稱說嫉惡如仇保民若赤臨風灑淚誓不與海盜俱生

者然而畫餅指梅原非實事更有假神道以愚黔首欲以虛言退寇嗟虐民雖甚愚非嬰兒鳥獸比也既無仁愛之心又復巧為遮飾民隱誰為昭察是以益思百公不置矣廣洋地分三路惠潮為路之東廣肇為路之中高雷以下為路之西大海環其外東西南洋海舶叢集沓至咸匯於廣貨殖傳所謂番禺亦一都會也自羣寇陸梁海道遂多梗其初起也大率謂是疥癬之疾不以介意亡何而船日益夥黨日益眾標劫搏噬之勢日益張寇氛遂不可制維時著名者六股曰郭學顯原注亦名曰張保原注亦稱曰梁保原注亦曰曰麥有金原注亦稱曰李尚青原注亦稱曰吳知青其小股不計焉郭學顯張保同事巨盜鄭一者也學顯番禺蜚家子嚮業漁為鄭一所執並虜其父母兄弟遂脅從

鄭一死即率眾自為一股領船百餘號船各七八十人或百人旗幟色黑曰黑旗幫張保踵鄭一之餘孽以事鄭一之姪安邦安邦稟懦無能聞礮聲輒掩耳張保實左右之張保每劫畧眾有不前者斬之得財悉瓜分不事蓄積虜人不妄害仍聽命於鄭一之妻石氏或曰保與石氏陽稱主僕實陰為夫婦也領船二百餘號船各七八十人或百人旗幟色紅曰紅旗幫梁保一股附之旗幟色白為白旗幫三股分據東中兩路有急相救援互為首尾西路則吳知青李尚青麥有金三股有金兇有貴原注亦曰烏弟芝吉世居海康之烏石鄉曾受安南偽封迨阮氏滅始為盜海康生黃鶴者以事褫衣巾輒投有金作謀主為布偽檄脅鄉愚斂財物歲計得銀不下十萬兩兩潤洲硃洲孤縣海

外遂爲賊巢穴李尙青吳知青朋比以益其勢繇是東中西三路俱擾中外商氓不安業者彌年矣百公再至則周歷澳門厓門蕉門虎門以規約形勢亟下令曰此方苦盜久矣方今

聖人

人在上顧使下有覆盆無告之民海疆千里不能安枕席守土之

謂何吾爲命吏誓滅此朝食諸君其交勉之有治盜策者詣告余又嚴飭將士戒爾戎律毋泄視如昔用命者有賞不用命戮無赦又曰盜之所賴以抗士卒者火所賴以糜黨羽者食所賴以爲藏身之固者舟夫盜若是其眾不有接濟之者安能取不竭而用不窮邪迺差遣幹員分赴海口譏訶米艇及禁物之出洋者其要隘則戍以重兵賊於是不得食始困又准鄉紳呈首岸匪嚴詰潛蹤其武弁則不取庇爪牙通線索且穀米騰貴每

斛直銀二兩至三兩出口亦無所漁利洋盜益阻飢五月甲寅朔遂率幫船五百餘號闖入內河歷新會順德丙寅至我鄉九江東南方日嚮莫矣盤旋西海中越旦日卯刻劫畧鶴山傑洲賞裝人畜不可勝數巳刻回劫鄉中沙口屢焚不炤有載西穀大編從上流揚帆來鄉人守望者噤止之舟人以爲譌說圖肆搶不信順流下竟爲賊得賊窺窬欲入我桑園大圍鄉人勇氣百倍礮瘡放而鄉眾堵禦者瘡多當事急時駐防文武兩官率領兵役反嚮鄉人求救護窮迫可憐盡失從前據鞍虎視威勢殊可笑也賊旣不能入我大圍直下甘竹燔蕪墟場搶畧殆盡男婦多被殺虜停泊二日轉新會香山而出沿途殘破尸積填河署總兵許廷桂力戰射殺梁保滅白旗賊礮傷郭學顯父賊

黨死傷甚眾許總兵亦以失機陷敵可惜也百公聞報親率提督帶領水師赴救所過邨墟目擊情形泣數行下其所以矜恤難民者甚厚追逐出洋盜已遠去夫以秉節之尊不貲之身膽涉風濤躬禦矢石是真嫉惡如仇保民若赤不願與海盜俱生者雖未能嚴設內備遽斷接濟不知困獸猶鬪鋌鹿走險之義未免爲千慮之失然以旼假設捭循虛張告示以愚弄其民者其立心之險易行事之忠詐豈可同年而語哉公懲前事念鄉邨所以賊至輒糜者由平素恪遵功令臨時無守禦之具耳爰便宜行事許民間練壯丁鑄火礮造軍械俟事定繳官而章程甫下守備未堅賊復於八月時從蕉門入沿河邨莊徧遭荼毒惟東莞風俗勇悍以敗賊聞而黃連鄉爲南順下游門戶軍火

素具又水陸交通龍江龍山勒樓甘竹九江沙頭河清古勞諸處各鄉率勇赴援相持月餘礮聲不絕於耳火光不絕於日勵而獲全其餘雞洲烏洲大洲上直下直熹涌紫泥瀾石等處被難之家奔告制府登聞鼓至爲擊碎公憤氣填膺大集舟師十面兜禽困賊於赤瀝角之大嶼山偵知其地水勢內淺外深艤艫難入檄令各兵船堵塞海口載蘆草數十艘實以燄硝硫磺縱火焚之將聚而殲焉賊大懼乘昏黑死力冲突潰圍逸去或謂有統兵元戎久在行伍庇賊與賊有連當賊闖入時遣子勸止爲所畱恐玉石俱焚故逸賊以免子未知其審弗敢決也先是郭學顯一股有乞降意因公銳意剿賊且恐無以取信未果也故當張保困赤瀝角時求援於學顯學顯弗許乘其敗縱擊

之禽三百餘人奪大船十有六赴歸善縣之平海獻捷乞降公謂能殺賊立功卽吾卒何以異遂親往受之收其眾六千餘人船百十有三銅鐵大礮五百兵械五千有六百其黨馮用發郭就喜張日高等數十船水手鋒銳千人散處於陽江新安者亦降黑旗幫卽日消滅事聞

上獎學

顯功授把總餘各畱遣賞敘有差時嘉慶十四年十二月也赤瀝之圍張保已膽落學顯降梁保殺聲勢益孤危內河守備已固怨毒已深勢必不敢復入其假息須臾徘徊海上者直釜底游魂耳况我公囊底運籌之智胷中數萬之兵將來督飭將弁決勝萬全所謂滅此朝食者信非夸語東中兩路旣平西徼一隅曷與廣肇惠潮諸劇寇堅脆異形眾寡異勢更何能爲吾

見掃除可翹足待耳果爾則寰海鏡清方隅砥平我士民復見青天之頌庶非虛願矣庠抑吾聞公將大舉出師學顯力請從征前鋒當賊此甘興霸尉遲恭志事甚可嘉也學顯勉庠哉能以晚蓋過也如日月之食焉亦不失爲君子也公文作於十五年元旦其年二月張保投誠百公受之夏四月移師高雷麥有金等亦破滅海寇平人服公先見著有植蘭庭遺稿一卷道光三年年六十四邁末疾卒於家

據碧樓存稿植蘭庭遺稿世紀續採訪冊參脩

十四世奮之公

公諱成發字鎮元別字奮之善臺公子也生而孤露幼而單約艱難立家滋至小有一游吳會投老家園爰自任冠至於莫齒嗜義必顛覲貨能廉卹嫠哺孤治道與墳黽勉昏喪收眠廢殘

交有始終戚儻有恩故朋友有所歸中外無閒言蘇人唐景泰
大賈也公客閭門時與契轉貨來粵常主公年七十矣嘉慶十
二年將反蘇人之負之者且三千金弗能得也以券付公從容
謂曰吾老矣恐不能復來故人贈別君辱收之公陽許諾明
年唐不至公卒因長洲朱君履四千里外反其金河南范三者
先富而貧亦依公濟珠江溺公罄貲求遺齒遺嫁孤女無失時
常以歲三月挈友人祭其冢海泊三水韓某貸公貲屢折閱於
後亡且八百金慚弗能面也公診知有故召其子出券焚之嘗
謂兒子士琦輩曰凡人力能竭而不及人非天命富貴意也
女曹識之矣歲購讀朝報遇有遽雖夜漏數下必閱視而後寢
凡當代民俗瘠腴吏治良窳及四方風蝗水旱時時能言其大

畧嘗曰吾賤無理人責知之何益也聊以慰吾意耳其襟抱如
是自奉顧損尅一裘數十年每食儉儉不掩豆食已宿以復進
泊老未嘗浪費一錢也道光九年卒年六十八公原階從九品
後以子次琦任山西襄陵知縣贈公如其官

獻腕亭公墓誌世
紀續採訪冊參脩

據潘鐸本墓誌子
士琦本行狀梁紹

十四世在樞公

族子傅巖公附

公諱祥麀亦曰德貴字懿脩號在樞江勝公子也貌如植鰭髮
短而卷鬚髻垂兩耳夏月裸程支髀稜露癯然類老瞿曇口吃
遇紱急則面發赤項下筋暴起如筋語益期期不可曉雖睡及
人面聽者弗之悉也少篤學事孝廉關西亭先生西亭名斌元
授徒至眾公特見器異同門士黃羽颺茂才會政衡太學徐品

經布衣族子光宇等嚴之亞於其師已又與鄭教授耀東陳太
學能兼輩讀書會城三元道院者累年數人者咸善交有本末
膠漆終其身然公中陋少容酒酣縱論天下事不合輒觝隙拄
頤錙銖不肯相讓或擊按踞坐客皆愕然罷酌其彊直自遂
蓋天性也嗜讀書勸以爲枕餐以飴口泊老病未嘗一日廢離
屬文堅韌刻瘦肖其爲人思入溟滓瀟精漱液恆撼擢胃腎然
後出希風蓋在耘渠樸山兩老人年六十猶手寫二家文罽池
成帙故所作二家爲近孝廉嘗謂曰生自負良厚顧方今房行
卷牘爭副時好公卿有氣力者又不聞俯眉禮士能度外學人
才者生持此將安歸庠公聞之瞿然然亦終弗變也貞操壁立
辟遠不義若穢滂平居不以私干人世亦無干以私者至迺寒

暄都絕惟宗族交游陷有過舉卹然如水火之相救也誠意惻
款受者媿心里人有臯負至辟道行不敢睹其面文行著聞數
奇不遇院考鄉闈連蹇見誦年七十餘鬢髮白矣猶攜扶幼
少捉考具追逐童子場中見者愍之不善治家人產晚益顛頓
時有憂生之嗟嗣息橫殞餘子劣不肖妻又病瞽宛其入室戚
戚無驩加平生故舊零落鮮復存者每哀訃及門素車臨弔未
嘗不悽愴傷懷濯然有詩曾太學之亡也賦詩哭之其末二章
曰推解尋常事難君更乞隣殘年頻累友寒室借餘春此誼時
時憶浮生日日陳老懷泥絮帖感舊一輪困白挽陶彭澤酬章
待友聲誰令稱後死反哭誄先生賸葉無停實離鴻有斷鳴述
哀哀不極天地日孤清族子光宇喪公又賦詩曰達生豈不悟

哀慟難自持頽齡偈桑榆翻興後死悲緬懷事疇昔出入相追
隨狂狷雖各殊坦懷兩無欺自謂猛著鞭與子俱奮飛奄忽五
十載棄我忽如遺余近抱沈疴困頓久不支二子兩蠢然株守
無能爲老去拙謀生十旬恆九飢卒女數過從笑言出茅茨女
比邁軼軻終歲苦驅馳常恐先朝露與女相見希豈謂事反覆
先見靈牀惟搔首問蒼天夢夢何無知卒有繼起人努力趁明
時就瞑可帖然委順無嗟悌生芻亦徒爾聊爲勸一卮精靈儻
來歸夢寐將求之情辭酸苦時人扼腕誦焉尋邁未疾不能自
運其體困牀席者十年孫曰式曾弱冠有文見者期遠到溫良
孝謹最能事公竟以待恙積勞先期歿歿論者謂近世文人之
阨未有寬酷如公者然匪是則公嶢嶢之節弗顯君子固窮亦

無膏焉年八十以道光二十五年卒著有沛國世紀續一卷公
近支子弟爲儒者名大章字佐朝號傅巖慎齋公長子公從子
行也少稟承公恩猶父子爲人天性渾噩坦率任真人世嶮詖
事不干懷抱年五十一卒

據黃鳳在樞先生六十壽序採訪冊參脩

十四世次棠公

公諱錫光字昭時又字次棠晚號介如翥軒公次子也少脩謹
眠下言徐終身無迂物上人色爲鄉鄙所愛重館同縣何職方
文綺家數年何公先輩名德見公雅相欽矚其後遇公里族必
斂容問訊起居且曰朱先生君子也古人無擇言擇行吾於朱
先生見之矣其引重如此中歲後不去鄉塾爲童子講讀師垂
三十年號有師法其訓導學童必諄諄與講朱子小學尤得蒙

養遺意云咸豐九年卒年五十九

據採訪冊脩

十五世曉崖公

族彙弟我坡公附

公諱光字維昌小字義大號曉崖德隱公子也國子監生幼從學關孝廉斌元族父明經程萬咸賞其疏儻讀書粵秀講院院長魏春松觀察成憲錢損齋編脩棧尤喜之通中無城府然剛腸嫉惡嗜飲好俠不為疆禦屈肇慶廣寧以有竹肆圩田為豪猾兼并公詣縣訟縣宰蒙古柏某暴伉吏也入左右言不之直公與辯坐以咆哮拘苦之數月引出嘑謂女伏未公抗聲曰生異鄉孤賤何緣敢與豪右爭稅嘗何緣更登公門施不遜里諺有言破家縣令滅門知府生縣絲一命且係公手奚有於田特惜官有權民有口傳播四境人將謂公縱虎狼踐良懦公固

權擅殺生未必能與外郡一監生爭公論曲直也宰懼然動色迺謝遣公里居益喜任事大小宗諸祠一手營繕不介嫌怨率閱歲迺成輕財愛施解衣推食親故資以緩急晚歲漸窘弗卹也為文不較工拙受簡後輒躡短榻上屬橐維誦琅琅聲殷牆壁見者恆目笑之少耽吟詠與詩家香山黃培芳番禺凌揚藻游培芳等許其深摯其渡白鷺潭作曾文學紹鞏至為繪圖著有曉崖詩鈔一卷道光十四年卒年六十四族彙弟璘字璘曜號我坡樂泉公長子蚤補邑弟子員受知於學使史公夢琦性方慤亦知醫

據香石詩話晚亭文存自得堂詩鈔世紀續採訪冊參脩

謹按香石詩話知曉崖公少游諸名士間

名維垣號翼廷後入國學迺更今名改號

曉崖世紀續記載未詳今附列於此

十五世梧軒公

公諱鳳揚原名海字定南號梧軒勉亭公長子也讀書赴考容儀溫偉舉止詳華洒如也迫婦翁陳侍衛書及勉亭公命改就武選通臂善射以冠軍補邑武生中嘉慶十二年丁卯科武舉時鄉中武選盛興無行者或扞網橫行陵暴隣里甚且椎埋縱博爲姦利公繼武厥考稱世科門閥獨能循循謹敕不異儒脩出就鹽筴文義蔚然對者不知爲韎韐士勸游反教技間舍後生多以品藝從之游道光六年卒年五十一

據世紀續採訪冊參脩

十五世浚泉公

公原名士森字深遠以字行號浚泉南臺公長子也南臺公字

雲萬入國學以字行媿媿謙嘿平生無疾言遽色質性最清公孺染家範言無枝葉行無雕績亦以寧謚謹重見推士友間號稱悃悞爲詩文思理泉涌若借書於腕鏗期可成時命不偶郡邑試屢邀拔識弗獲售錄遺試鄉場亦遭擯給諫德清蔡公賡颺來督學以古學辭賦被知獎許甚盛勵充補脩生然天性介特非禮不履當道光己丑府考亟列前茅矣時望以冠軍相屬有稱內幕遺索賅者公拒絕不與竟見絀士論皆不平而公勿悔也嘗賦四十生朝有感詩句曰未老豈能荒筆研求名非爲快恩讎大匏過石知何用小草依山且自由亦可想見其襟度坦夷恬懷寵辱矣年四十九道光二十七年卒著有自得堂詩鈔一卷文無存橐公歿後子逢望百方撻採所獲尙希

據廖熊光本墓

誌子逢望本行
畧採訪冊參脩

十五世辰階公

公諱堯勳原曰士謙字瑞占號辰階種玉公長子也形幹短小
而精神焰發雙眸炯炯灼人幼稟大父龍泉公家學顓詣制舉
業批郤導窾能自運其才年十七就館河清授童子讀窻甚不
能畜僉僕躬自汲炊嘉慶末補邑庠青衿廿三載始領道光二
十年庚子鄉薦其文猶十年前夏課也不樂北方風土一上公
車而罷咸豐二年冬有

旨

明年大挑親知愆患再與計偕三年二月盜襲金陵江淮道梗至
蘇常閒遽反抵家需微疾數月遂不起年六十三公天性夷曠
待交游有終始未嘗變節有所厚薄陳新疏數也不爲翁翁熱

亦不爲厓岸蘄絕之行數嘗乏窘外人不能窺有無時或薪粟
告盡無所較計輒趣常所過從清譚詠謝盤桓竟日室人交謫
謂不省憂但回首曰女憂之寧得錢邪卒不變亦不怍也雖閑
居冠屨巾鞞楚楚涓潔貴游或無以過與之游者自少迄老未
嘗見其言色有若愁歎者能飲酒微醺不亂淺斟緩引不喜麤
豪廣坐狎譚風趣橫出逞逞一坐傾靡然援舉俗俚洗洋屑散
寬而不切未嘗有所舐觸閎傷其深謹超遠如此門人同縣李
徵霽嘗爲贊曰遐哉吾師其量休休其性無求其心則棄寘六
鑿而天游未嘗不入富貴之場而不能渝其耿介之脩未嘗不
歷險巖之途而不能亂其素履之夷猶但使有酒盈鍾有粟盈
甌有繒被體有卷充眸或坐而行或吟而謳遂嗒然而喪我付

榮辱於浮漚故不知者見其寄情楮杓也以為董糟邱見其口不言貧也以為晉清流見其無所臧否也又以為皮裏之陽秋是猶指月者彼云大如盤此云小如毬所見各不侔也又烏能測其劣優也論者謂李君贊非直文章儻出也其敘狀公特有真知焉公所著有周易例一卷孟子評二卷

據李夢畦文集族弟士琦本墓誌世

紀續採訪冊參脩

十五世經茂公

公諱榮業字經茂衍亭公長子也渾然樸醇喜以忠利及物殆出天性未嘗知書而古訓所戒未嘗或蹈也亦無餘財而心力可到未嘗愒遺也少單貧備於市必察其出入無欺隱者迺受直不則多金弗願也司事於古勞布肆數十年市價稱平獲偽

金沈於淵曰毋註誤後人拾遺物榜於衢曰今度存某所道光癸巳大水齎貨直錢百緡寧其家循河清大隄下憫露處者顛連隨手散給抵舍腰纏遂空見小兒探雀殼為戲亦予之錢媪媪禁勅謂物命胡不念也戲者為止年既篤老兒媳復凋喪肆主勞某欲贍養終其身固不許曰小人食力朱經茂豈以口腹累它人哉力謝而反耕作自給冬月衣不掩胛得諸芋輒以分比隣無窘憊可憐色年八十無疾而終

據採訪冊脩

十五世晚亭公

公諱士琦字贊虔號晚亭奮之公長子也幼倜募母張孺人譙責苛峻迺束脩嚮學游里塾隨族父祥馨講誦有異常童及冠節日疏闊脫畧細謹用英邁知名道光四年以第三入補邑庠

十二年以第二人授廩餼每使者臨試廣州古學必選最擢等
先後七試皆一等十九年己亥鄉試與第次琦同捷公以第三
人魁其經座主涇陽張少宰芾江寧清中丞鐸奇賞其文初以
定元越六日迺易嘉應李庶子載熙然及門旅見二公誦其文
若宿構然猶以不能位寘第一人爲歎赴公車兄弟必偕二十
七年丁未次琦登進士公雀躍曰第齒比我富能比我高
君恩祖德圖報當靡涯也進取益奮先後七上公車多畱夏課旅食
京邸垂十年竟不第最後咸豐三年癸丑大挑當謁選矣行次
吳中會盜襲金陵蘇常恇動遂反擢歸歸未幾值紅寇之亂惰
惰蒙難鍵戶彌年亂已而公歿矣公爲人充健饒膂力視短而
明能於方寸楮作蚊腳小書與人交汎愛不訾雅俗市魁牙掾

咸集其門所至堂室皆滿用財不諱稱貸時時乞假通緩急然
持己自介居京師以醫術數爲相國陳公官俊尙書文公慶趙
公光所賓接未嘗干以私房師張繼鄒令東莞常館公及來宰
邑一見亟還張怪其遽公斂容曰在東莞爲門下生南海則部
民也部民止宿公門匪惟自介嫌疑抑恐傷公盛德邑富人某
牽命訟揣公能寢解之介梁孝廉植生持數百金爲壽公不應
賜之甚苦匿而免亦不以語人其節概不苟多此類里居殷憂
桑梓沈慮有遠識嘉慶末嘗著南順十一堡禦盜方畧十一堡
者上控西樵余邨下汔黃連勒樓龍江諸境大指謂我十一堡
地扼長江界連數縣爲五方之輻輳居百粵之下游外患內奸
易生由葉方今四方清晏謂宜合爲一團驅使形勢聯宇縣如

一室杜災變於未萌其書於團中保甲操防聲援阨塞鑄造抽分儲侍諸法纖悉具備當時與人言多不省近年紅賊起諸鄉堡以無備爲所乘輒殘燬蓋三十年而其言皆驗道光九年夏西潦漲猛沿江桑園等圍同時潰決十月羣議墾厚增高罄力脩築公前攘臂曰脩無益也水患洊至在海口不在圩隄近海豪戶昔築石壩以護沙今且築石壩以聚沙昔因河爲田今且築海爲田年年系積未知所屆故海口不通廣州水患未有艾也迺約陳詹簿昌運胡文學調德等諭廣肇兩府同志奏記大府大指謂西潦之發消長有期其漲也繇數尺至一二丈來以一二日越四五日其漲必止下流不壅五日後必消若下流壅塞前潦未退後潦又來或東北兩江齊漲消不如期必有衝決

圍基之患至圍決而官民交受其困矣東江水力不及北江之長其入海道又捷爲患較少北江水道漸長然無牂柯江以遏之雖爲患亦不甚若牂柯江則水長而力悍其洪濤駭浪自相擊撞日晴風定猶隱隱作雷霆聲爲患較東北江恆劇防牂柯江者歲用民力保固圍基有司促迫加高加厚似矣然自乾隆五十九年迨嘉慶十八年二十二年二十三年脩基者四次加高一二尺逮四五尺有差潦至輒與圍平此急計非本計也疏濬入海下流石壩未築者禁已築者圻此本計也非民所能爲也牂柯江自肇慶上溯雲南匯諸江水有蓄無洩肇慶峽以下地少岡阜匯水愈多其流益駛以平行之地受徼外經行七八千里驕悍之水奔逸橫恣非尋丈圍基所能禦也地勢然亦水

勢然也查牂柯江自峽下順流至新會北街口猴子山南出外海西出江門猴子山腳十年前水深六丈有奇今冬月水涸水勵丈餘十年以後豈堪設想總緣沙田多築石壩水遭壅遏流緩而泥淤故也江流入海支流凡六一曰思賢濬水過三水縣西南會北來諸水至省河直注虎頭門入於海一曰甘竹灘水過順德黃連板沙尾南注於海一曰仰船岡水過福岸馬寧香山之海洲沿河有石壩二三十度長各十餘丈沙田所圈築也其會步口第一埭口中閒海瀝有石壩長七八十丈東爲小欖河面將淤矣西曹步尙通舟耳一曰白藤頭海口直注古鎮夾岸石壩十餘度江水將失故道矣一曰河塘潮連潮連居南河塘居北中一河合古鎮仰船岡諸水下有石壩二度截流橫築

長各二十丈水爲石激湍急不得驟洩舟人過此非風力與槳潮弗能上矣一曰猴子山水繇寨尾墟過外海嘴逕注古鎮香山界古鎮沙尾連百頃沙大鰲沙至竹洲頭自外海嘴至竹洲頭約四五十里西界外海傍逕東成沙雷霆廟鴉洲山夾河有大石壩十餘度牂柯江汪洋澎湃之勢至此竟弩末而收觀矣百頃沙左曰廣福沙廣福沙左曰芙蓉沙三沙排列各有大港爲界而沙之左右石壩攢築或百丈或數十丈或築至中流居然與天吳海若爭權三十年後海將成溝壑亦揚塵而廣肇兩郡宅土芒芒人煙浩浩牂柯一水不知徙嚮何處流也繇廣福沙下注神灣東西有承田壩稍下爲燈籠洲東入澳門又東出三窰外無居民已達大洋矣西入內河泥灣門往者內洋大船

絲此入睦洲墟絲睦洲墟入江門今皆阻淺不可行凡此皆牂
柯江入海要區亟宜嚴切疏通者也又附進西江達海圖歷繪
水勢委屈狀書上大吏咨嗟動色主者奉行不力事竟無成然
指陳確鑿不辟勢要時論壯之性孝友事繼母關孺人得其驩
心撫愛諸弟最篤居不異財食不異按勞苦疾困嫗嫗摩拊如
嬰孩不知其年之壯佼也當離別繾綣溢於文辭錄其初計偕
與季弟書一篇其辭曰季弟無恙征舫既邁遽逾十晨願言之
懷昔人所謂愛而不見如何如何吾弟內娛護背外隆德聲雖
曾輿齧指而動操召南樵山而振稱絜其勤勞無以喻之也曷
束裝後待友佛山鎮兩日迺得成行舟師謳櫂汎若鳧鷖游子
寄音眇望魚雁是夜宵半衝風驟激頽波彌厲元雲靄空夙夕

不解雨雪告零先集爲霰曙發虛包之汎莫宿黃巢之磯嚴霜
實而葭莢淒元冥深而若英晏鼈頸之灘迷茫虜津逮龜手之
藥歎惻虜水工行路之難論我端倪矣家累凡百弟克當之回
晚舊鄉心魂慰藉惟吾弟續昏一事軫結未忘上有黃髮罷勞
晨夜下有雛稚噢咻哢笑茲事之亟豈煩覩縷顧鄉土是諮亦
云省便而此邦之人內教陲壤習錮旣久庸計門戶宛宛處子
或有季蘭之好悠悠靡俗恐入齊咻之教天下多美何必是求
權輿弗戒後懊焉集行子過計是用悽悽風水蹇逆行郵遂淹
以今二十七日到清遠縣弟兄健好餐飯猶昔兼多徒侶解誨
憂虞誥誡家人勿我爲念從茲度嶺浮泝西下楚歌千些湘波
萬重背湖涉江釋舟趣陸更復馬首斷雲千里隨夢雁足飛雪

南游九江外史家譜
卷十一
崇朝灑襟七聖皆迷之野惘惘而驅車耦耕不輟之鄉栖栖而
問道山川合沓息影何時靜言思之百憂集矣夫人情迹接則
多忘景逝則恆憶歲華不居游讌未極往時家街羣從如龍齋
居盤盤言笑晏晏東方未明已對牀相語西柄之揭猶露坐未
眠論難紛起聲與百舌競蠻觴詠橫飛酒微一斗亦醉魏文有
言當此之時忽不自知其樂也繇今以思曠若星漢儼諸形容
尙繪心目每當落帆江滸擁衾無寐清角朝厲游鴻夜吟我懷
云勞不可說也自惟寡薄豈辨任官此行邀福或叨一第思遂
南歸寄迹丙舍將吾叔仲長奉板輿對鵲占門徒魚築宅陸機
之屋不閒庠東西何點之山畧分庠大小時及霜露言羅雞豚
祀先之餘兼以速客雖甑生塵而日晏風吹薜而歲寒而風詩

教睦取鹿食之相嘑金石歌商結鶉衣而不恥明明如月長照
其素風溫溫恭人永垂爲家法閉門養親至於沒齒雖三公上
袞百城南面何以易此哉其許我庠非敢望也有問訊者達此
籛言音塵未積風雲逾闊家食餘閑奉勛光采勞人草草筆不
抒心及寢疾時事無弗語終不及室家疾革賦絕筆詩曰生無
善狀死何悲化去翻令眾垢離獨有深情忘未得離魂常繞鶴
鴿枝其至性不亂如是健於爲文尤研究聲詩同縣羅侍郎文
俊謂其從漁洋歸愚兩家議論入不從兩家議論出故其自得
之妙不離漢魏六季三唐風槩而自瀟性靈番禺張太守維屏
謂其晚作獨窺陶杜真詮古律皆如果熟霜紅氣味老辣順德
廖孝廉亮祖謂其取法在唐賢以上宋以下卽非所屑軼視一

時作者邃於醫顧不自意曰不能無失也視疾以扶翊元氣為主而謂河閒丹溪喜用陰冷之劑瘳之真氣為非宜平生治驗頗多卒不立醫案咸豐六年卒年六十二所著禦盜方畧上下篇外有西江達海圖一卷晚亭文存一卷其詩則谷泉吟草二卷北行集一卷南還集一卷鴻爪集一卷西行集一卷畱都集一卷息鞅集一卷都為怡怡堂集初公鬱鬱懷用世志束髮試有司皓首隨計吏蓋終身皆在名場中其僑京師也羅侍郎欲為入貲得儒官公不願也卒亦遭迴不及仕歿既數載以弟次琦前任山西襄陵知縣陳情於

朝

詔馳贈如其官

據面城樓文鈔廖亮祖怡怡堂集序梁紹獻本墓誌陳志澄本行狀弟次琦公絕筆詩跋世紀續參脩

謹按晚亭公上粵中大府論西江水患書

中有濬字从水从咎讀告音不見古人諸

字書廣人以為水相通處曰濬蓋方言也

見廣東新語

十六世普存公

公諱庭森字廷琛一字普存曉崖公長子也其榜名曰澄瀟泊注選更今名道光四年補郡學第一十一年辛卯鄉試中副榜充副貢生二十一年就職直隸州州判旋改就教職咸豐五年絲捐輸奏上奉

旨以復設教諭分發選用需次於家公蚤自鏃厲力學有聞處骨月間屈已忍尤能容門內橫逆平生見義勇為其尤著者業師潘

孝廉澍漳卽世公勸分於諸同門士得五百餘金經紀其家爲
黨正禁彘夜瀆祀毆巫祝之惑民者鄉論躓之其就齟務於粵
西也歷興業賀縣兩牢盤流寇擾賀脅以刃公譚笑卻之不爲
害又值土客交鬪戈馬洶洶同事者逸矣有張民則者公挈與
俱畱險阻備嘗卒能全濟其身而商戶所託汔無損未幾待選
回籍咸豐八年感疾卒年六十一於是士友陳明經觀濤等相
與推論謂惜公奄逝不階尺寸柄故區區自見勵如此曩令得
藉手郡縣吏爲

天子守疆土則食焉不辟其難古所稱士窮見節而皦然不易所守
者非它人必公也烏虜末流守信不負者希矣故世以此重公

據陳觀濤本墓誌世
紀續採訪冊參脩

始祖獻謀公配關安人

始祖妣關安人者獻謀府君配室也父曰關公母曰麥氏世爲
九江上沙里富人無子誕女一卽安人也在寵不驕淑譽騰里
郇父選儷歸獻謀府君裝送資貽甚盛安人脩婦節有桓少君
孟德曜弛妝提甕之風元明革命偕隱邱園公親在野之勞安
人相其乏公峻處士之節安人感其高儀家穀子厥後始大惟
安人實毓慶基焉

據世紀康熙
丙申譜參脩

二世正夫公配李安人

正夫公配李安人者邑大同鄉人也系出大同古巷性柔惠有
承順之德兄某蚤世遺息勵存族豪瞰其貲朋謀攫噬日逞不
利於其孤勢將踣殆安人泣言於公曰李氏兩世血食在此兒

矣與公殫力禦侮以次折紆於法產殖無隕弱息允延安人力也一時謂女造門楣

據崔吉本墓表世紀康熙丙申譜參脩

四世前塘公配黃安人

前塘公配黃安人者同鄉東海人也黃公金富次女贈君安定女弟太常少卿僉都御史重之姑也蚤聞孝謹洎歸德容端肅閨範卓然產子廷實甫三月而前塘公歿誓志守義無故不出中堂血戚周親希見其面奉先訓子遠近稱女君子焉嘉靖二十年郡邑紳儒耆老具言安人德侔共姜動遵禮法堅歷清苦四十餘年遠近敬仰號曰女宗顓呈邑令李公源令謂女子之行於親也孝婦也節母也義而慈止矣志行可嘉實關風化牒請司道撫按逕疏奏聞三年禮部尙書席公書題奉咨行覆勘覈

實布政使林公富分巡按察僉事李公中兩陳奏覆四年有詔旌表節婦勅有司建坊旌門仍蠲免丁役以供侍養於時風聲播聞國俗悚動一變云壽九十嘉靖十六年卒崇祀節孝祠

據

欽定古今圖書集成閩媛典列傳廣州貞烈傳廣東戴通志阮通志廣州府志南海縣志九江鄉志南海節孝錄羅憲本墓表世紀康熙丙申譜參脩

謹按戴都堂璟輯廣東通志在嘉靖十四

年乙未已載朱仕志妻黃氏嘉靖四年旌

而阮通志張府志郭縣志列傳俱譌作宋

仕志妻府志坊表門會城貞烈坊已列朱

仕志妻黃氏尤為自相牴牾

按府志前明省垣有惠愛

忠賢孝友貞烈四坊惠愛坊列秦任巽以下六十七人忠賢坊列周高固以下五十

人孝友坊列漢董正以下五十四人貞烈坊列南朝陳南妻戴氏以下五十四人朱仕志妻黃氏
第三十五 安人為黃安定妹九江鄉志

列傳譌為安定女生於正統十三年戊辰卒於嘉靖十六年丁酉壽九十而康熙丙申譜後傳謂終於十八年己亥壽八十二正統戊辰下至嘉靖己亥實九十二年非八十二也世紀相沿而誤鈞屬疏舛今悉據本墓表原石刻更正

又按本墓表前塘公卒於成化十八年壬寅年三十二康熙丙申譜迺作八年壬辰年二十二亦誤附正於此

五世林坡公配鄧安人

林坡公配鄧安人者新會粵塘鄉人也今隸鶴山縣莊慧知大體鬻

兒女尤遠姑息林坡公捐館次子文直繼歿安人則謂其婦郭

氏曰而夫蚤世而子不教家胡賴焉郭唯唯自是姑婦日督兒

嚮學即夔州知府讓也讓時甫四齡朝莫往書齋必起居大母

所大母輒問記誦幾何有無惰棄時啖以果餌誘使耽讀語諄

諄不可置讀或少輟大母且詈且泣叩首悔伏迺已讓弱不好

弄學殖蚤成安人之教也訓女亦有壺則其季適同鄉關沛裁

兩月而夫死竟以苦節聞自有傳安人嘉靖二十七年卒年八

十二據楊瑞雲本墓誌脩

謹按康熙丙申譜後傳謂安人生於成化

八年壬辰終於嘉靖二十五年丙午壽七十五誤今據本墓誌世紀更正

六世白川公配郭安人

白川公配郭安人者邑大同鄉人也郭故大同名家安人尤秀出其族歸白川公公曠達不事生產家政皆安人經畫恆鈞產入以字夫兄諸子愛之如己出有籍弟子員者脫簪珥脩學宮先生贄夫兄子謨選貢南廡又斥簪珥資其行御臧獲最矜恤朝夕寒暑必時其衣食曰彼亦人子耳其恩誼周篤亦天性也白川公歿安人在中歲姑耄矣諸孤稚弱未教安人旦夕掖侍姑退迺舉公平生言循循命子躬織紵分鐙而課其業嘉靖三十七年戊午子讓舉於鄉歸拜堂下安人泣謂之曰父有遠志

今少慰矣尙未也女其勉之又七年而安人卒年六十七屬纊時第勅讓以勤脩職業仕勿負官語不及家事其邁識如此萬曆十一年皇子生加兩宮徽號子讓時官南京戶部河南司主

事徵恩贈安人

據九江鄉志王宏誨本墓誌金節本行狀世紀參脩

六世順川公配周安人

順川公配周安人者邑大同鄉人也世宅水北里父綱字一鑑安人歸孝養尊章相夫詔子皆能以畏慎安貞舉其職二子封咸寧知縣庠生學濂庠生學懋鈞著文譽使者校士迭爲冠軍時稱雙鳳顧數奇屢躋鄉閭安人惟勉使績學每失解輒諭之曰遇合命也淹速時也女父祖世載其德天命弗僭後必有達者其敬脩以俟之萬曆十三年乙酉孫凌霄領鄉薦喜謂二子

曰此而父祖食德之報也女曹第勉為善世有榮問矣厥後孫曾蔚起科第宦歷一時驟赫竟如其言安人與順川公俱躋大耄相敬如一日以萬曆二十年卒年八十九初順川公從姊適順德古朗邨陳其誦生子甫亂隨母歸寧即陳大理克侯也嘉靖癸卯夏相與避水患於牛山祖祠克侯莫出不還母恐憂形於色安人曰第寬之此子非凡兒保無它也克侯既長仕學咸有所立為時聞人故人謂安人識鑒非直其自知名也據陳克侯本墓誌脩

六世捷泉公配岑安人

捷泉公配岑安人者同鄉岑連奎女也優有壺德尤廣記博聞時陳述古昔成敗旤福之轍為兒孫永鑒兒孫世世服膺其訓

羣興起於文行號為多才萬曆二十五年卒年八十六安人之

葬大學士趙公志皋銘其墓歎為內相不誣云據趙志皋本墓誌脩

七世石潭公配馮安人

石潭公配馮安人者新會粵塘鄉人也今隸鶴山縣父曰涓夫安人

端靜儉勤出於其性石潭公為儒彘弟多生計時不給安人躬蠶績絲帛以佐薪粟公得肆力下帷無何選貢擢科除湖州府通判兼權烏程知縣湖州推官安人從宦數年吳興為天下望緊劇地富盛甲東南公同時三印繫肘公事旁午家政出納一委安人而安人衣食儉陋不改惟時時以清白相勸勉及公為忌者所中意不憚安人斂衽前曰仕宦固有止歸耳好官作得盡邪公默然良久曰卿言是也即日投劾歸安人至老手不停

作足不踰閩懿範為遠近所稱後石潭公二十年迺卒年八十

三 據子樵本墓誌 採訪冊參脩

七世綱庵公配關淑人

綱庵公配關淑人者同鄉牖邊人也族姓稱石地堂關氏淑人
事君姑恪甚得其驩心初娠二女即勸公寘筮遂連產丈夫子
淑人尋自有子顧終弗二視諸子讀書官舍淑人督之嚴朔望
趣五鼓起行禮客至必噉令出揖每聽諸子彈琴不調則曰趣
心所致也心不能理琴其能讀書虛聞公堂鞭扑聲輒愀然不
樂生平不信巫覡釋道惟女紅酒食是議嚴於祭祀雖老必躬
必親頒餼餘雖臧獲必徧自奉儉約諸子問所嗜曰徼天之幸
甕飧不乏足矣綱庵公出粟振饑淑人亦斥所藏分里中貧嫗

自公捐館淑人持家十九年婿陳熙昌成進士外孫陳子壯及
第孫實蓮鄉薦魁其經淑人猶健飯時羅拜堂前天啟二年卒
年八十六先累封安人以孫實蓮卹典推恩諭祭贈淑人

據九江鄉

志世紀參脩

謹按綱庵公於臨川知縣任內以歲闋授

階文林郎妻關氏封孺人於戶部主事任

內以慶典晉階承德郎妻關氏晉封安人

至萬曆十五年在夔州知府任以天下知

府治行第一用特典賜璽書晉階並未及

其妻室也璽書文內開載甚明世紀謂累

封恭人殊為未覈

七世龜臺公元配關安人繼配黃安人

龜臺公元配關安人者同鄉關樂泉次女繼配黃安人則邑之沙頭鄉人也父日文郁高才生兩娶皆有令儀公儒者造次必於禮法關安人曲副其意克戒容止婦順無訖篝鐙侍讀恆漏盡無勸色公時名冠庠序賓友以文會者往來接踵安人罄所藏備極供奉有雜佩贈遺之風於其理也年勵四十中外僉盡傷焉黃安人孝敬而慈鞠前子甚於己出於幼者愍其失恃尤煦煦憐之所生子必教以禮讓相先慊慊如也及督之嚮學則鈞不恕加嚴未嘗以嫌止以愛溺也時訟言曰有子而弗類不如其無故公歿而諸子皆競爽矣安人年八十一卒

據朱可貞本墓誌脩

八世湛源公配關安人

湛源公配關安人者同鄉關峻山女戶部主事家炳從姑也家炳稱其淑善溫仁公家先難後裕安人主內政其貧不以菲廢禮其裕不以富損名戶部員外郎光允公族子行而家炳之師也嘗謂家炳曰婦德四夫人有焉其見重於子姓之賢者如此

據關家炳本墓誌脩

八世莘犁公配李孺人

莘犁公配李孺人者順德鹿門鄉人太學生思集女兵部何公翼外孫也幼讀經書通知大義最耽風雅能吟詠而德範凝然不才掩旣歸孝事親闈君舅中憲公亟稱賢婦比執喪泣血三年哀悃備至諸子童孺辟咄受書論語諸經多繇口授婦工餘暇喜閱古傳記時時徵引以寓箴規莘犁公天性任達孺人

持家輔以嚴肅整齊內外法行知恩諸子有文字交必加禮敬
 徵逐燕辟不敢躡其門長子伯蓮計偕誠之曰古人云水流萬
 物金玉畱止京師人海品流最雜女曹入庠其中當時思在我
 之節惟聖人為能與世推移耳晚益澹泊食多齊素珈翟之榮
 佐餽之奉夷然不寘懷也以伯蓮封太孺人卒年八十三

據九江鄉

志採訪冊參脩

八世箕作公配易淑人

箕作公配易淑人者新會橋頭鄉人

今隸鶴山縣

永昌知府道源女

也毓秀名門才慧為一時冠工詩歌善楷法尤喜讀書至老手
 不釋卷耽玩忘疲婦德醇備孝于尊章惠于築里終身未嘗以
 辭色加人性樂施予戚里昏喪諸賴完舉偶直乏匱輒典質衣

釵繼之尋常斗升釜庾之需取之如寄也勛諸子交賢進善有

陶母風崇禎十三年子實蓮令德清隨箕作公就養官舍公不

樂華膳將歸矣會浙西大水實蓮以振荒不趨漕逮赴詔獄緹

騎及門跪哭訣曰兒奉職無狀遺大人憂今日夕就死不能復

奉二尊矣淑人流涕謂曰不圖垂莫之年復見滂母之事雖然

人誰無死兒矢守官死死猶生也且忠孝寧得兩全庠左右皆

涕泣不能仰視既歸甥禮部侍郎陳子壯時以直言削籍奉母

居白雲山走書來唁曰鄉關郵報希漏竟不審德清解任何似

嗣得舅父母歸耗畧知功令所指然聞徵額旋亦報足雙鳥雖

蹙繫庠上有聖明之鑒裁下有司計之平準當無深慮且塞翁

之馬安知失不為得也舅父雙尊辭子舍而閒關舟楫將毋稍

勞奉已入里間起居適安衰况漸寬京邸好音昕夕且至愚甥
栖遲一邱不能奉侍家慈問渡趣候惟有三祝加餐耳承示政
錄備悉甘棠遺思敬謝拜發不盡依馳子壯公姊子生長外家
夙爲淑人撫愛故致懇如此實蓮至詔獄冒死極奏地方荒苦
狀帝大感悟遂起謫籍復其官旋擢刑部主事戶部郎中蓋帝
知其忠實有意嚮用而淑人竟以其時考終里第矣實崇禎十
五年九月也年六十六先封孺人後以實蓮卹典推恩諭賜祭
葬贈淑人著有名閨吟蘭圖草行於代甥子壯嘗贈詩曰顛頓
當年似舅人稱詩猶憶渭陽新不知方法操彤管畱與班家子
細論姻家子黎州守春曦著論以謂方諸班大家似其文而行
或過之也

據三朝野紀陳文忠公手簡九江鄉志五世孫天瓊本墓誌參脩

八世正齋公配張安人

正齋公配張安人者同鄉張惟治女也公無祿蚤世遺男一女
一安人年二十四嚙指剝髮誓死衛孤編衣藿食五十年不變
鄉邑以全節稱子龍齡至孝女適龍山馮氏生子顯忠天啟丁
卯舉鄉薦安人猶及見之年七十餘適卒獲旌崇祀節孝祠

海節孝錄九江鄉志世紀參脩

謹按南海節孝錄鄉志本傳鈞作朱叔政妻蓋稱正齋公字

八世湛一公配曾孺人

湛一公配曾孺人者同鄉趙涌人也州守曾公儲女孫父庠士
宏彞母林氏幼聰叡善鼓琴通列女傳女誠女論語讀之輒生

遠慕年十九歸公婉順克孝不譽其儀公考業之暇輒就孺人
討論書史莊後有溪流竹林爲公習靜讀書處孺人亦時相就
鼓琴自娛泊公入仕什九宦游孺人戀奉晨昏多不隨行扃室
訓子皆成其志中外諸媼禮遇周渥公之守寧州也孺人選一
姬侍公將就道矣公以書力卻垂老不寘媵妾論者兩賢之公
老年多病孺人躬侍湯藥歷寒暑不勸平居無妄言怠容尋常
履綦不至庭戶事神竭誠盡慎不調不瀆嘗曰人能隨事盡道
子孫效之必昌幽有鬼神猶明有聖賢皆呵護善類若爲不善
而佞佛持戒得罪反深見理明礪聞者動容萬歷癸卯覃恩封
孺人孺人與公白首相莊並躋大耄公終於崇禎十二年又八
年孺人迺卒壽八十九關中李家宰遇知嘗謂孺人德業黽勉

以終事大家雖內範之鍾郝傳經之宣文抑何以過其懿行聳
動一時朝士如是據九江鄉志李遇知奉議大夫南海朱公壽
記田仰本墓誌夫兄子光祖閨秀瑞興墓誌

八世衷一公配關安人

衷一公配關安人者同鄉石涌甲人也父曰關奇甫來歸居高
門樓所謂高門樓朱烈婦者也初衷一公篤志下幃以攻苦邁
疾疾且革目汪汪安人而無語安人泣告曰君脫不卒奄忽
若猶有襁裸物妾當忍萬死守全之今若此惟有相從地下耳
頷之而瞑安人號不欲生既殯請於公姑爲夫立嗣又丁寧叔
姊善視二人家人知其意皇恐譬慰侮張一室安人哭曰毋久
畱我死令亡者久待轉斂靈牀放聲大慟腸斷遽卒以殉夫烈

婦旌崇祀節孝祠

據南海節孝錄九江鄉志康熙丙申譜參脩

謹按南海節孝錄及鄉志本傳衷一俱作

冲一蓋以音近而譌

九世庇亭公配盧安人

庇亭公側室周安人李安人幼女孀姑媵婢張繡雲附

庇亭公配盧安人者佚其里貫天姿貞勁尤負器鑒鼎革後公以故諸生屢為鄉約長安人從容尼之曰時有廢興君舊門子謂宜沈潛明夷用晦之義服膺柱史守雌之誠順時遵養庶保貞吉公竟為里豪關公性所害順治十六年六月三日夜購海盜關阿蘇糾黨焚畧其家安人被執抗罵死賊無義受指喉擄財殺人神理不誣將求治女地下遂受刃而死妾周氏李氏幼女孀姑媵婢張繡雲以安人死咸恨不欲生奮與賊搏竟皆見

害女十姑年十七細姑年十六並姝麗有殊色賊擄以行中道不屈死尤烈自有傳一門七烈聞者敬焉安人及周李兩安人鈞以殉難烈婦

旌崇祀節孝祠諸女同時獲

旌

予祀惟張繡雲以婢媵未邀表卹云

據閩媛典列傳廣東郝通志阮通

志南海縣志南海節孝錄世紀參脩

謹按

欽定古今圖書集成廣東郝

通志阮通志南海縣志諸書列傳南海節

孝錄題名俱臚載朱協蓮妻盧氏妾周氏

李氏而康熙丙申舊譜協蓮名下祇注配

盧氏庶李氏而周氏竟闕殊爲疏漏

又按世紀庇亭公傳謂賊關阿蘇殺妻女九人而

欽定古今圖書集成閩媛

典本傳祇臚舉七人名氏又標題爲朱氏七烈豈妻女實止七人其二人爲練丁莊客之流故畧而不數歟

又按嘉慶二十三年

欽定大清會

典凡僕婦婢女女尼女冠拒姦致死者建坊於本婦女墓前不於祠內設位然則當今功令張繡雲亦准題

旌特不

予祀耳

九世微龕公配區淑人

微龕公配區淑人者高明阮涌鄉人也郡丞區公益女孫通守大樞中允大相猶子而戶部侍郎大倫之女也從兄弟懷順懷素懷瑞懷年同產弟懷炅宦業並有時名一門父子羣季先後以文章道德流聲海內號阮涌區氏淑人名閨蘊秀見重諸昆如左思謝元故事微龕公蚤負奇童譽未冠以第三人魁其經淑人翟莠來歸時人以爲美譚戚里榮觀蔚稱克配公旣殉國難二子稚幼邏騎偵之急淑人涕泣託孤於其妹及妹壻陳隱君禁解獲全語具微龕公傳淑人亦崎嶇山海阽危萬狀而知足周防始終不辱一時高其志行謂匪特於兩宗無忝也以較宋文天祥妻歐陽氏彼有慙德矣初以公令德清拜恩封孺人

公獲郵贈晉封宜人再晉淑人

據楚庭稗珠錄九江鄉志採訪冊參脩

九世子亭公配歐陽安人

子亭公配歐陽安人者順德白藤鄉人也公立年遽殞遺息國

柱生甫周晬孤露無依安人掬爪趣事備嘗酸苦將茶集蓼游

歲彌年家以漸溫兒亦有立兄公給事中伯蓮最矜重之

據從兄伯

蓮子亭公墓誌脩

九世長齡公配溫安人

長齡公配溫安人者順德龍山鄉人也父曰崧岳居小陳涌安

人雖長編戶知書學禮曠識絕人滄桑後公欲棄諸生服安人

亟贊之曰周之士貴秦之士賤時事可知妾與君且休矣公意

遂決晚歲長齋繡佛祝曰不求金玉富但願子孫賢又謂潛龍

以不見為德時勸公孫言深隱辟害云卒年七十二

據世紀脩

十一世近松公配鄭安人

近松公配鄭安人者同鄉人也近松公儒學有聞齋志以歿安

人產二子年二十一而孀舅姑衰矣夫兄廷彩麗兵籍征戍不

還小叔廷選幼弱門戶子微甚父母將奪其志矢死不從脩職

加虔食貧靡悔蓋年九十五猶事蠶繅也鄉人欽其苦節獲

旌崇祀節孝祠

據南海節孝錄九江鄉志參脩

謹按康熙丙申譜近松公二子宏泰宏斌

而鄉志鄭安人本傳謂生一子傳聞誤也

南海節孝錄及鄉志本傳俱作朱亮臣妻

蓋稱公字

十四世奮之公元配張孺人繼配關孺人

奮之公配先後兩孺人元配張氏繼配關氏皆同鄉人也張孺人系出奇山岡南里父國滄隱於醫嘗游瓊崖間傳異人祕尤精風角壬遁禊占孺人小字戊蘭生而奇慧授之書諷誦畧皆上口凡婦工組紉術家占相學之輒能張公憐之過於諸男數歎曰阿誰當扃門楣獲吾女矣洎歸於公黽勉同心家始蕃殖然性喜全濟務持大體嘗謂公曰財以濟用苟當也奚惜庠公家勵中貲而義聲先路孺人相之也容止端詳遇非常不亂盜魁黃毛閩者族子行也橫行劫擄垂十年瞰公省墓歸大言於公從兄林長曰若弟富當犒吾白金千啣嗟未能先輸五百不然白刃無親情也兄以告孺人不爲動公入孺人出之並遣兒

俱出比莫盜黨挾兄至嘑門索公孺人從容扶媪持燭出陽詰曰嘑叔者誰何遽也叔偶出盍入而待之闕闔納盜魁餘人竢於門外嘑婢子瀾茗盜昂然入拱手踞上坐已解佩刀寘按錚然作聲孺人復詰嘑叔何居盜曰捕急假數百亡命耳門外盜亦羣譟曰亡命耳闕聲若雷屋瓦皆震孺人正容曰女稱叔屬雖遠猶骨肉也果有急當告我今迺親而自疏洵然聚不逞之夫歟不祥之器欲將何爲爲人子弟當諄亂如是邪叔固不恆歸卽歸豈旦旦豫爲女謀者於是盜遽麾止其眾且怒曰徐之何驚人若是孺人迺入探釵珥數事約直十餘金又解腕中條脫益之陳几上謂之曰女將去不足可復來何待叔也盜大慙唯唯不敢受遂巡持械出當是時盜黨二三十人露刃如

林勢將用武公兄倚戶震怖環索索作響媪候火薪熱其手不知也而孺人色夷氣溫吐辭泉涌陽陽如平常盜出語人曰吾日殺人不轉眴出沒海洋波濤烽火未嘗動心今膽落於某家婦矣孺人聰彊善記昏喪賓祭諸器數經目不忘慮事有識直疑難逆復沈思如寘器平地必輾帖妥一時族黨紳儒若處士祥馨太學光宇武舉鳳揚等時登堂推商孝廉堯勳尤嚴重之進止諮而後行事之如母訓子至嚴未嘗假辭色長男士琦幼跳盪譙責苛峻卒矯厲有成處士恆語人孺人於古禮法如敬姜聰識若憲英爲中外稱首矣道光元年卒年五十四初孺人有羸疾繇歷歲時於其卒也偶恙卽自知不起謂諸子曰吾疇昔之夜夢易竈陘而新之夫中饋女子之職而竈陘者老婦之

祭也毀故而更新吾必無辜矣果然關孺人父曰茂良代居大申翹南社溫厚慈良嚮前子如腹出子次琦嘗邁疾十旬孺人愍念親眠藥湯眠食俱廢積勤體爲之敝性量冲粹多喜少愠無貴賤一飲以和婢媪臧獲有喋喋室中恩怨者掩耳不聽曰吾耳不聞心不怒也其寬中如此及見諸子獲雋同年決科道光二十四年卒年七十同治元年以次琦前官山西襄陵知縣

恩旨贈兩母皆爲孺人

據潘鐸本墓誌子士琦先妣張孺人行狀梁紹獻晚亭公墓誌參脩

十五世憑泰公配張安人

憑泰公配張安人者同鄉桃源里人也父張冠時安人年二十四而公橫歿誓節嫠居二十有八年慘怛如一日未嘗有嘉容舅在楸公老儒性峻姑晚病瞽安人事之惟謹咸得其驩

其姊長子生在極公命畀以後安人名曰阿嗣蓋慰其志也家
窶不畜婢媵姊婦曾子女十餘人皆安人鞠眠曾亦柔順相謹
至老無迂言道光十六年卒年五十一又十年有

旨旌

表節孝崇祀節孝祠

據南海節孝錄
採訪冊參脩

湛一公女瑞興 九世

閨秀瑞興者湛一公季女也母孺人曾氏萬曆二十三年公初
任新興教諭又二年誕女學署中爰以命名焉孺人通書史善
鼓琴故瑞興幼有母風公旋繇湖廣咸寧令擢守雲南寧州孺
人以滇粵萬里不敢遠親庭亟攜瑞興歸養亡何公宅憂罷職
讀禮山中瑞興甫十歲侍邴下以孝聞且能曲體父母之心以
上貢於王父故王父以下胥鍾愛之諸兄姪憐之尤至人謂瑞

興孝慧殆天植也稍長媿媿婉嫵清心玉映有林下風儀選字
吳孝廉長息未行感疾遽殂縣憫時猶宛轉顧孺人曰兒病革
矣死命也毋傷母心瑞興之死生十五年矣兩兄戶部光允文
學光衡不忍其遠厝也瘞之於里第西南蝸山去家數百武塋
廬相望而從兄通守光祖為之銘其辭曰田產珠璣昌郡之陽
孝謹維思女德攸彰茗華徒剡瑩光忽藏燕悲鶴泣鬱虜蝸岡
歸寂輪迴女其益臧

據田仰湛一公墓誌從
兄光祖本墓誌參脩

庇亭公女十姑細姑 十世

閨秀十姑細姑者皆庇亭公女也並生有淑姿容華冠代祖母
李母盧咸讀書知大義二女孺染家範故笄年豔發而節操凜
然順治十六年六月三日夜海盜關阿蘇焚畧其家盧安人死

家眾死義者山積語具公與安人傳十姑年十七細姑年十六賊闕其美竟爲所擄挾之渡西海卽西江也十姑迺大罵賊子橫害無辜若有鬼神將不舍女我二千石之孫忠孝之門詩書之裔肯愛死辱賊手求活邪遂仰天大哭及中流奮身入水賊拽止之痛齧賊手血淋漓賊怒鋒刃交下應時見殺細姑同被拽不得死罵尤憤烈賊彊顏譬慰細姑哭曰賊狗奴天下寧有害人之親復施無禮於其兒息者於女安虐死有蚤莫奴寧得良死何不促殺我舉頭觸賊刃復嚼舌氣欲絕賊知不屈亦遂見害數日家人尋獲其尸鈞衣裾不亂面如生遠近聞者盡傷焉以殉難烈女

崇祀節孝祠

據

欽定古今圖書集成閩媛典列傳廣東郝通志阮通志南海縣志南海節孝錄世紀參脩

謹按

欽定古今圖書集成廣東郝

通志等書謂賊擄兩烈女挾之渡海蓋沿

當時文案卷宗原文而未加核定者其所

謂渡海卽渡西江也九江鄉西南東三面

皆距西江過江卽鶴山縣藥逕司地雍正

九年以前未立鶴山縣則新會縣境也土

人方言至今噉爲西海不曰西江廣東新

語謂廣人凡水皆曰海渡江曰過海溯江

曰上海是也蓋嶺外近海故凡水皆以海

名猶之北條之水河爲大故河北之水皆

曰某河南條之水江爲大故江南之水皆

曰某江也考國語齊語桓公曰吾欲南伐
何主管仲對曰以魯為主反其侵地堂潛
使海於有蔽渠弭於有渚環山於有牢桓
公曰吾欲西伐何主管仲對曰以衛為主
反其侵地臺原始與漆里使海於有蔽渠
弭於有渚環山於有牢按魯衛二國境不
至海而管子云然者齊人近海故凡大水
皆沿襲稱海云爾然則濱海之人水皆稱
海有自來矣

外傳附

正夫公適馮氏女 三世

正夫公適馮氏女者同縣大晚鄉馮處士妻也景泰三年分南
海西南境立順德縣處士遂為順德人公生平祇一女憐甚女
有至性歲時思父母未嘗不涕洟雖異地時使歸寧焉感疾不
果還遽卒兩家傷其志畱葬母氏為立窀穸於牛山陽古花街
東畔鄉人命曰大滿姑婆家音轉故謂晚曰滿地因以名過者
至今瞻敬焉女裔緒轉盛有登甲科者 據崔吉正夫公墓表採訪冊參脩

林坡公適關氏女 六世

林坡公適關氏女者同鄉關沛妻也歸勵兩月而沛卒忍死待
遺腹及誕男也屬有謀不利於其孤者家室漂搖瀕死者屢矣
貞厲不渝卒全宗祀同時里人梁妃慶妻周氏殉夫燔烈焰中
兩節久未表揚鄉論稱屈女兄孫廩生疇太守讓適子也以學

行為官司所器迺白狀於邑令陳公儀陳公慨然親式門閭匾周之居曰貞烈而匾女之居曰純節時萬曆四十二年也據

欽定古今圖書集成閩媛典列傳 大清一統志廣東通志廣州府志南海縣志九江鄉志南海節孝錄世紀楊瑞雲林坡公墓誌參脩

謹按林坡公名廷昭字國明鄉志貞烈貞

節傳稱關沛妻朱氏父國明即舉公字也

迺復有朱廷昭適關氏女傳傳云朱氏父

廷昭適續岡關生一子夫亡伯每侵占其

產寘之不校子娶未幾死死撫一孫終老

壽八十按楊瑞雲林坡公墓誌公三女長

適黃鸞次適庠生岑鼎鼎見鄉志上壽傳妻朱氏附見傳中

次適關沛兩月而夫歿遺腹孕孤竟守苦

節云云然則鄉志朱廷昭殆別一人歟考

康熙丙申譜吾家明代至 國初復未見

有字廷昭者

綱齋公適曾氏女

六世

適陳氏女適關氏女附

綱齋公適曾氏女者同鄉曾應珪妻也應珪嘉靖癸卯舉人父

俊知廣西融縣子仕鑑官戶部曹司世居趙涌珠山隅俊以宦

應珪以隱仕鑑以文學世擅顯名女曰嬪其門是稱克相孝事

親聞奉大歸之姑劉尤摯舅居官廉夫以館穀贍家食弟妹昏

嫁悉出己貲女佐之不色吝偕隱林泉縞綦無悶有鴻妻萊婦

風其教仕鑑也慈而有方恆以師友切劘為急故仕鑑雖文譽

日流而游道脩廣仕粵聞人若相國蘭谿趙公志皋總憲秀水
 沈公思孝粵中名士若順德歐公大任東莞祁公衍曾歸善葉
 公春及同縣龐公嵩霍公尙守等皆風義終身初女生性孝淑
 幼侍綢齋公靈川學署公權興安義寧兩縣疾卒於官女傷慟
 隨母兄閒關扶櫬歸其後縣歷歲年悲懷往事每歛歔爲子仕
 鑑言未嘗不霑襟浪浪泣數行下也故仕鑑於其歿也亦哀毀
 踰禮廬墓終喪有紫芝甘露之祥而歐公爲作風木辭其序指
 以謂曾君仕鑑哀思母夫人之賢而棄養廬居有樓焉蘭谿公
 題曰風木予傷夫曾君之心之似皋魚也故爲之辭辭曰嗟海
 日兮嵯峨江西下兮牂柯繼龍蟠兮雲施九派流兮增波商秋
 蕭寥兮噫氣愁墜榭葉兮吹女蘿君有母兮奄逝祿不逮兮奈

何盼黃竹兮新阡靈徠下兮山阿揚翠旗兮孔蓋倏驂螭兮高
 駝木驚焱兮旦且夕吾誠不能解君心之苦兮而使其涕之不
 涔淫而滂沱悠悠兮終古爲君弦吾詩兮安歌後以仕鑑貴贈
 孺人兩姊俱有懿行長適順德古朗陳其詡生子刺史克侯次
 適同鄉石涌關世立生子審理玉成並有聲迹據歐虞部集慶
 歷稿曾仕鑑綱
齋公墓誌
 世紀參脩

白川公適崔氏女 七世

白川公適崔氏女者同縣沙頭鄉崔吉妻也吉登嘉靖丙辰進
 士服勤官次女庀家政著賢聲洎吉繇戶部郎官出督湖廣雲
 南糧儲而女從兄謨母弟讓科第繼武或仕至顯僚女淑慎始
 終無所介恃閭德爲族姓所宗據王宏誨白川公
 墓誌採訪冊參脩

上川公適老氏女 七世

上川公適老氏女者同縣沙頭鄉老則膺妻也嫁三月而夫故遺腹生一女夫氏有欲奪其志者女矢死靡它以柏舟自誓壽七十而終 據南海節孝錄九江鄉志參脩

謹按鄉志本傳云父文擢蓋稱上川公名

綱庵公適陳氏女 八世

綱庵公適陳氏女者同縣沙貝鄉陳熙昌妻也母淑人關氏初未有子女生而婉孌習禮明詩見者歎為閨房之秀而性情貞正邁出等夷嘗讀春秋傳至宋伯姬卒喟然推卷曰嗟虐諒為女子當如此矣熙昌蚤英敏父宏棄為國子監典籍綱庵公官戶部同在南京遂締昏亡何公守夔州自免歸熙昌來就甥館

因移居焉子子壯娠有異徵夢神人以桂枝拂其腹曰俾爾生兒流芳百世及誕奇香滿室女心知其異益嚴於督養課百常童後子壯文章節義卓然為一代完人母訓之力為多寧靜有識熙昌舉鄉試第一登甲科子壯繼之以第三人及第入翰林色不加喜比熙昌居諫垣子壯出典試並以廷闈削籍亦不加戚第助曰風霜雨露莫匪君恩順受其正可也天啟丁卯莊烈嗣位魏忠賢伏誅父子同起用會熙昌病卒子壯服闋累遷禮部右侍郎爭宗室授官事再削籍迺歸白雲山築雲淙別墅奉母以居 按廣東新語雲淙別墅中有寶象林無畏巖鏡機堂海曙樓邀瀑亭餘簫閣清冷庵朋泉諸勝久之起故官未上京師陷福王立起禮部尚書時馬士英與阮大鍼朋比為奸子壯為所抑

大清兵破揚州偪金陵士英竟挾王與太后闔宮潛遁次日子壯始驚覺遂微服出聚寶門沿途訪駕繇太平走蕪湖聞王被執北去過杭州陳華字家得太后懿旨令星馳還粵集旅勤王迺歸抵家覲母依戀慈闈女曰聞南京已破吾以女爲死矣今福王何在女何緣獨歸子壯具述君臣失散之繇泣然流涕女勉之曰盡忠卽以盡孝女毋以我故藉口養親若徒知事我以生反速我以死也子壯涕泣受教丙戌福州廣州兩唐王相繼淪沒子壯旣受永明王大學士督師特勅遂以丁亥六月與舅子故戶部郎中實蓮舉義於鄉女毀家紓難盡斥金貲釵飾犒士爲搢紳大戶倡義師再攻廣州不克子壯長子上庸敝歿卻入高明實蓮戰死子壯力竭就執遇害於廣州信至女閔然不哭曰

兒獲死所矣世世受恩非是無以報國從容入室投繯而卒時丁亥十二月也其從女適番禺文學黎彭齡蚤寡聞義泣曰吾家世篤忠貞不可以辱遂匿兒方潞於胥井自沈死沙貝陳氏爲宋朝散大夫康延之後先明天順成化時陳珙爲上猶訓導歷職有聲厥後簪纓相繼垂二百年珙子錫應天府尹錫子紹文梧州通判猶子紹儒南京工部尙書紹儒子宏采宏棗宏熙慶遠知府宏棗善化知縣宏棗子熙韶熙昌熙韶思恩知府熙昌吏科都給事中熙韶子子履知縣熙昌子子壯子壯子壯子子太保東閣大學士兼兵部尙書總督廣東福建江西湖廣軍務子升兵科右給事中子壯子上庸兵部職方司主事門閥實與有明一代相終始故兩人言云然累封一品太夫人戊子江

粵反正子壯卹諡文忠贈太師上柱國特進光祿大夫中極殿
大學士兼吏兵兩部尚書番禺侯遂晉番禺侯太夫人女雖世
席華牖不喜服食奇麗之珍惟樂於家園中激流植援清景相
對暇則偕弟田妻李疇妻易文字送還弦琴鬻茗或招才媛劉
蘭雪清吟適興而已無它嗜也惟勅子孫忠孝大節及與諸女
嬪譚說閨闈名義則感涕低徊不能已已聽者爲之心肅嘗攜
劉媛飲靖節堂限韻詠竹媛獻詩曰最愛庭前竹漪漪曲檻中
孤高撐落日勁直埽秋風龍去投筇巧鸞歸製笛工平生好脩
節賴有此君同女最喜其落句曰如我心也爲諷誦久之自女
之歿百有餘年吳郡李瑤著繹史以謂有明自熹毅二后湛身
殉國不失陰教之正實於前史有光焉而臣僚之母妻姬妾卓

卓以盡節聞者如靖國黃忠桓得功夫夫人聞難自盡禾中徐忠
懿石麒麟夫人孫氏赴水死南海陳忠簡子壯母朱氏自縊九江
邨漳浦黃忠端道周夫人勸公盡力王事旋自經死它如華亭
張忠穆肯堂四如夫人迸命不辱風化之盛未有過於此者烏
厚禱已

皇朝乾隆四十一年褒錄勝朝殉節諸臣

賜子壯專諡祀忠義祠有司議以史冊所稱忠臣嬪女死節者應入

祀節孝祠以示表揚

制曰可女獲崇祀節孝祠

據明史列傳

御批通鑑

欽定勝朝殉節諸臣

南疆釋史廣東通志廣州府志南海縣志番禺縣志廣東新語
欽定古今圖書集成閩媛典列傳
大清一統志
粵東詩海叢桂賸稿練要堂集陳文
忠公手簡陳文忠公行狀世紀參脩

謹按明史陳子壯傳謂福王立起禮部尙書至蕪湖南京亦失守迺歸南疆釋史陳子壯傳同以行狀校之則殊未覈行狀載子壯在南京數爲馬阮所抑又載金陵將陷子壯詆趙之龍錢謙益語尤厯落則非未至可知行狀又謂子壯抵家覲朱太夫人於五羊城依戀慈闈太夫人曰聞南京已破吾以女爲死矣今福王何在女何獨自回子壯爲具述君臣失散之繇泣然流涕太夫人勉之曰盡忠卽以盡孝女毋以我故藉口養親若徒知事我以生是反速

我以死也子壯涕泣受教此段文字情真事信義正辭嚴千載以下讀之令人感涕實足追配古列女傳文若如史所云則此番問畲爲無因古人驚心動魄之文全行蕪沒矣

又按黎彭齡妻陳氏爲陳文忠公從妹卽尙書紹儒曾孫番禺縣志作紹儒女孫尙無大謬廣東阮通志作紹儒女則誤矣陳氏子方潞或作方璐按通志選舉表實作潞璐蓋傳寫之譌

又按劉蘭雪名祖滿順德人

欽定

古今圖書集成閩媛典列傳作劉蘭雪蘭
雪集又有陪陳太夫人游海珠詩云五日
築湖似渡瀘釵頭爭挂辟兵符珠遺洛浦
誰家女印解湘潭楚大夫雪撼怒濤搖壘
堞波侵斜日漫浮屠歸來試把諸姬問適
聽菱歌記得無最為當時傳誦

敬台公適馮氏女 十一世 適梅氏女附

敬台公適馮氏女者同鄉馮峩輯妻也峩輯父曰起聖女年二
十五夫故無子冰蘖自持奉祖姑暨公姑咸得其驩殫心嗣續
遴小叔芳子後其夫壽踰九十有妹為順德梅人倩妻芳次女
適同里黃迺輔並以廿齡甘貧勵節人謂一門貞操悉原女風

化云 據廣州貞烈傳廣東通志南海縣志南海節孝錄參脩

謹按縣志本傳稱九江朱伯誠女蓋稱公
字

江勝公適關氏女 十四世

江勝公適關氏女者同鄉關儒業妻也翁關昭秀居田邊古里
女行四小字阿銀貞靜專壹至性絕人歸半載而儒業亡矢以
身殉或譬之曰翁即貧母家奉溫飽兒又讀書知禮義能女庇
也人生實難何短見如是不應俗亡者有七七之祭以三七為
重奠醮極哀牢醴既徹伺閒整衣自經死 據採訪冊脩

MICROFILMED

南海九江朱氏家譜卷十一終

